

Jó rekukue oĩa Jó rekukue oĩa

Jó ma peteĩ ava iporayvu va'e, iporiaukue va'e'ŷ, Nhanderuete re ojerovia ete va'e ha'e ov'yaa rupi tema oiko va'e. Ha'e gui Nhanderuete pe Satanás ojerure Jó oeko a'ã aguã re, anhetẽ ri Nhanderuete pe oikoa oexaxe vy. Ha'e ramo Nhanderuete oeko a'ã uka. Ha'e rami rã Jó mba'emo oguerekva'e opa vyvoi, ta'y kuery omanomba xapy'a, ha'e Jó re ae ou ai vaikue imbojexavaiarã.

“Ha'e ramo Jó opu'ã vy omondoro oao, onhopĩ oakã ha'e ipukupa oupy yvy rupi. Nhanderuete omboete vy aipoe'i: ‘Xepire rei reve aiko'i va'ekue ha'i rye gui, ha'e xepire rei reve ju 'rã aa. Senhor ma mba'emo me'ëa, ha'e oipe'a va'erã avi oiko. Ta'ima'endu'a porãa Senhor rery re!’ he'i. Ha'e nunga ha'e javi py Jó ndojejavyi, neĩ nda'ijayvui Nhanderuete ha'eve'ŷa rami joguerekoa rami” (1.20-22).

Ha'e gui ma ou Jó irũ kuery mboapy ikuai va'e. Oĩa py opyta are rire hexeve jogueroayvu okuapy ojexavaia re. Ha'e kuery oikuua rami tei Jó gueko vaia re oiko axy. Ha'e rã Jó ma “Xerekoporã va'e” he'i, ndoikuuaai guive mba'e re pa haxy va'e Nhanderuete ombouague. Amongue py Nhanderuete reko re ijayvu ndovy'aia rupi, ndoikuuaai rei vy.

Ha'e gui opaa py ma Nhanderuete ombovai vy oexa uka pavẽ gui ipo'akapave ha'e hi'aranduve va'ea. Ha'e ramo Jó nda'evei ramo vy aipoe'i: “Anhetẽ ri aikuua vy e'ŷ xeayvu va'ekue, mba'emo

xevy pe iporã vaipa ha'e aikuua va'erã e'ŷ re anho”, he'i (42.3b). Ha'e rami rire jypy guare gui Nhanderuete omoingo porâve Jó.

Jó heko porã ha'e mba'emo oguerekopaa re ijayvua

¹ Oiko peteĩ ava Uz yvy pygua, Jó hery va'e. Ha'e va'e ava ma anhetẽ rupi ipy'a ha'e heko porã va'e. Nhanderuete renonde ojererokyjea rupi vy mba'emo vai gui ojepe'a kuerei va'e.

² Sete gua'y ha'e mboapy guajy kuery oguerekoo.

³ Hymba kuery ma sete mil vexa'i, três mil camelos, quinhentos toro meme ha'e quinhentos mburika'i. Ixupe ombo'eapo va'e kuery voi mbovy rei e'ŷ ikuai. Ha'e rami vy kuaray oua katy ikuai va'e gui oguerekopave va'e oiko.

⁴ Ta'y kuery ma peteĩ-teĩ ro rupi oje'oi 'rã jorirerire ngaru ojapo aguã. Ha'e rami vy mboapy gueindy kuery oenoĩ kuerei 'rã ha'e kuery reve okaru ha'e oy'u aguã.

⁵ Ha'e kuery okarupa ma nhavõ Jó gua'y kuery oenoimba kuerei vy oiky'a'o ukapa 'rã teko vai gui. Ha'e rami vy ko'ẽ ramove opu'ã vy mymba oapy reve ome'ẽ 'rã Nhanderuete pe ha'e kuery mbovy pa ikuiaia rami vy, mba'eta aipoe'i: “Xapy'a rei ma xera'y kuery ojejavy ra'e, opy'a py nguuetre rovai ijayvu vai vy”, he'i vy. Ha'e ramigua ae Jó ojapo riae oikovy.

⁶ Ha'e gui peteĩ ára Nhanderuete ra'y kuery ou okuapy SENHOR renonde ojexa uka aguã. Ha'e kuery reve anha voi ou.*

* ^{1:6} “Nhanderuete ra'y kuery” he'ia ma hembiguai anjo kuery re ijayvu vy.

7 Ha'e ramo SENHOR oporandu anha pe:

— Magui tu reju?

Anha ombovai SENHOR:

— Yvy ha'e javi rupi aikoague gui aju — he'i.

8 SENHOR oporanduve ju anha pe:

— Rexa pota pa xerembiguai Jó re? Mba'eta yvy re jipoi avave rei ha'e va'e ramigua anhetẽ rupi ipy'a ha'e heko porã va'e, Nguuete renonde ojererokyjea rupi vy mba'emo vai gui ojepe'a va'e — he'i.

9 Ha'e ramo anha aipoe'i SENHOR pe:

— Jó nda'u rive teve nguuete renonde ojererokyjea rupi oiko?

10 Mba'eta ndee ma repena porã hexe, hoo re ha'e opa mba'e oguereko va'e re guive. Ha'e rami vy opo py ojapo va'e rei remoingo porã, ha'e rejapo mba'emo yvy re oguereko va'e hetave ovvy aguã rami.

11 Ha'e rami teĩ emokuave'ẽ ndepo, ha'e ixugui eipe'apa opa mba'e oguereko va'e. Ha'e rami vy rexã 'rã neronden py ijayvu vai rã nderovai — he'i.

12 Ha'e rã SENHOR aipoe'i anha pe:

— Ma'ẽ, Jó oguereko va'e ha'e javi ma ndepo'akaa py oĩ, ha'e rã hexe anho ta'vy emoi eme ndepo — he'i. Ha'e ramo SENHOR renonde gui anha oo ju.

Jó ojexavaia py teĩ ndojejavyiague

13 Peteĩ ára, ta'y kuery guyke'y jypygua ro py okaru ha'e vinho oy'u okuapy.

14 Ha'e gui Jó-a py ou peteĩ hembiguai aipoe'i va'e:

— Vaka kuery reve yvy roikaraĩ, ha'e kuery katyi'rui rupi mburika kuery avi okaru jave

15 ore kuery re sabeu kuery ou xapy'a vy oguer-aapa. Ha'e rami vy nerembiguai kuery ikuai va'ekue ojukapa kyxe py. Xee anho'i aa jepe, ndevy pe amombe'u vy aju — he'i.

16 Ha'e va'e ijayvu teri reve ou amboae ju. Ha'e vy aipoe'i:

— Tata Nhanderuete-a guigua yva gui ho'a vy oapypa ra'e vexa'i ha'e nerembiguai kuery ikuai va'ekue. Ha'e vy omomba. Xee anho'i aa jepe, ndevy pe amombe'u vy aju — he'i.

17 Ha'e va'e ijayvu teri reve ou amboae ju. Ha'e vy ha'e va'e aipoe'i:

— Caldeu kuery mboapy henda rupi nhomboja'o vy camelo kuery re ou vy ogueraapa ra'e. Ha'e vy ojukapa nerembiguai kuery kyxe py. Xee anho'i aa jepe, ndevy pe amombe'u vy aju — he'i.

18 Ha'e va'e voi ijayvu teri reve ou amboae. Ha'e vy aipoe'i:

— Nderajy ha'e nderajy kuery tujave va'e ro py okaru ha'e vinho oy'u okuapy jave

19 teko a e'ŷa katy gui yvytu atã opu'ã ouvy vy oo re ojeapi jova-jovai katy gui. Ha'e ramo ha'e kuery áry ho'a ramo omanomba. Xee anho'i aa jepe, ndevy pe amombe'u vy aju — he'i.

20 Ha'e ramo Jó opu'ã vy omondoro oao, onhopĩ oakã ha'e ipukupa oupy yvy rupi. Nhanderuete omboete vy

21 aipoe'i:

— Xepire rei reve aiko'i va'ekue ha'i rye gui, ha'e xepire rei reve ju 'rã aa. SENHOR ma mba'emo me'ea, ha'e oipe'a va'erã avi oiko. Ta'ima'endu'a porãa SENHOR rery re! — he'i.

22 Ha'e nunga ha'e javi py Jó ndojejavyi, neĩ nda'ijayvui Nhanderuete ha'eve'ÿa rami joguerekoa rami.

2

1 Peteĩ ára Nhanderuete ra'y kuery ou ju SENHOR renonde ojexa uka aguã, ha'e anha voi ha'e kuery reve ou henonde ojexa uka avi aguã.

2 Ha'e ramo SENHOR aipoe'i anha pe:

— Magui tu reju?

Anha ombovai SENHOR:

— Yvy ha'e javi rupi aikoague gui aju — he'i.

3 SENHOR oporandu anha pe:

— Rexa pota pa xerembiguai Jó re? Mba'eta yvy re jipoi avave rei ha'e va'e ramigua anhetẽ rupi ipy'a ha'e heko porã va'e, Nguuete renonde ojererokyjea rupi vy mba'emo vai gui ojepe'a va'e. Ha'e ma oĩ atã ha'evea rami oikoa py, hovai apu'ã vy amomba rive aguã rami ndee xeapoxe tei — he'i.

4 Ha'e ramo anha aipoe'i SENHOR pe:

— Opire ha'e javi'i ha'vy tome'ë, mba'eta avakue opa mba'e oguerekoo va'e ome'ë 'rã guekove rekovia.

5 Ekuave'ëve ju ha'vy, ikãgue ha'e ho'o re epoko. Ha'e rami vy rexâ 'rã nerentonde py nderovai ijayvu vai rã — he'i.

6 SENHOR aipoe'i anha pe:

— Ma'ë, ndepo'akaa py amboaxa, va'eri ejuka eme ta'vy — he'i.

7 Ha'e gui SENHOR-a gui anha oo vy omomba'eaxy Jó ai vaikue py, ipy mbyte guive ijaptye peve.

⁸ Ha'e ramo Jó oguapy oiny tanhimbu áry, ha'e vy ojopy peteĩ nhae'ũ ra'ykue onhekaraĩ aguã.

⁹ Ha'e gui ta'yxy ou vy aipoe'i ixupe:

— Reĩ atã teri va'e ty'y ha'evea rami reikoa py? Ndeayvu vai na Nhanderuete re, ha'e gui emano.

¹⁰ Ombovai:

— Oikuaa ve'ŷ rei va'e rami ndeayvu. Nhan-deruete gui iporã va'e anho ri ty'y jajopy 'rã, ha'e rã iporã e'ŷ va'e ma ndajajopyi avi 'rã teve? — he'i. Ha'e ramia ha'e javi py Jó ndojejavyi oayvu py.

¹¹ Ha'e gui ma mboapy Jó irũ kuery mba'emo vai hexe oikoague oendu vy peteĩ-teĩ ou guekoa gui: Temã pygua Elifaz, Sua pygua Bildade ha'e Naamá pygua Zofar. Ha'e va'e kuery jogueroayvu vy Jó oña katy jogueru omombaraete ha'e ombopy'a porã aguã.

¹² Mombyry rupi teri ha'e kuery oma'ẽ jogueru vy ndoexa kuaai okuapy. Ha'e rami vy onhendu ratã ha'e ojae'o okuapy. Ha'e vy peteĩ-teĩ oao puku omondoro, ha'e yvate rami oakã áry rupi omombo-mombo yvy ku'i.

¹³ Ha'e rami vy hexeve oguapy okuapy yvy py. Sete ára ha'e sete pytû re ikuai va'eri peteïve hexeve nda'ijayvui peteĩ ayvu py ma voi, haxy ete va'e oendua oexa vy.

3

Jó otui'iague ára re ijayvu vaiague

¹ Ha'e va'e rire Jó ae ijayvu. Ha'e vy ijayvu vai otui'iague ára re.

² Ha'e vy aipoe'i:

³ — Xetui'iague ára ndoikoi ma voi va'e rire,

ha'e va'e pytū "Ixy oguereko peteī ava'i", 'ea
va'e avi.

- ⁴ Ha'e va'e ára pytūmba va'e rire,
Nhanderuete yvate gui nopenai ramo,
yvate oĩa gui omoexakā e'ŷ va'e rire.
- ⁵ Pytū reia ha'e kuaray'ã manoa anho oĩ va'e rire,
hi'áry rupi araipa va'e rire guive.
Ha'e va'e ára omoũmba va'e rire opa marā rei.
- ⁶ Ha'e va'e pyávy re ma pytū ete va'e omo'ã va'e
rire.
Ma'etŷ re ára mboae ikuai va'e rami
touquerovy'aave eme.
Ha'e va'e jaxy pe "Jaxy ikuai va'e regua"
ta'eave eme.
- ⁷ Ha'e va'e pytū imemby e'ŷa va'e rire,
ha'e va'e py nonhenduai va'e rire ov'y'a va'e.
- ⁸ Ijayvu vai kuaa va'e kuery ma ha'e va'e ára re
ijayvu vai ma va'e rire,
vixo vaikue ye'ẽ rupigua momyĩ kuaa kuery
ae.
- ⁹ Tá, ha'e va'e pytū jaxy-tata ko'ẽ mbijarā ndo-
jekuaai va'e rire,
ha'e hendy va'e oarõmby ndojekuaai va'e rire.
Ko'ẽ rai jave ko'ẽ oexaxe va'e kuery ndoexai
ma voi va'e rire.
- ¹⁰ Mba'eta ha'e jave py nombotyi raka'e ha'i ryepy
rokẽ,
xerexa py ajexavaia aexa e'ŷ aguã.
- ¹¹ — Mba'e re tu xee namanoi raka'e xeryru'i
pyve?
Mba'e re tu ha'e va'e gui aiko'i vy ndax-
eayvuẽvei?
- ¹² Mba'e re tu oiko raka'e o'u áry xekuavãarã?
Mba'e re tu oĩ ikã xemokambuarã?

- 13 Mba'eta ha'e va'e ndoikoi va'e rire aŷ apytu'u
porā rei 'rāgue.
Ake ramo xevy oĩ 'rāgue apytu'u aguā,
- 14 huvixave ha'e nhomongeta va'ety yvy re ikuai
va'ekue
onhono porāa aguā ojapo ma voi va'ekue py
itui va'e rami,
- 15 ha'e rami e'ŷ vy yvatekueve ouro ha'e prata
oguereko va'ekue py
ngoo omonyē va'ekue itui va'e rami,
- 16 ha'e rami e'ŷ vy hyru'i py oĩ va'e ojuka nhemi
va'e rami xee ndaikoi ma voi va'e rire,
kyri'i va'e hexakāa peteīgueve oexa e'ŷ va'e
rami.
- 17 Ha'e py ma ha'eve'ŷa rami ikuai va'ekue nanho-
moangekovei ma 'rā.
Ikane'õ va'ekue guive ikane'õgua nho 'rā ha'e
py.
- 18 Ha'e py ma escravo-rā ogueraa pyre ikane'õgua
'rā okuapy,
herekoa kuery ayvu nonhenduvei ramo.
- 19 Ha'e py yvyīgueve ha'e yvatekueve ikuai va'ekue
itui pavē 'rā,
tembiguai ikuai va'ekue voi opatō pe ve'ŷ ma
'rā ikuai.
- 20 — Mba'erā tu iporiaukue ojapoa ri hendy va'e
oexa riae aguā rami?
Mba'erā tu ikuerai va'e okuave aguā rami
ojapoa?
- 21 Ha'e kuery ma omano aguā anho oarō okuapy,
ha'e rā novaēi.
Ha'e kuery omano aguā oekave 'rā okuapy
hepyve va'e onhomí mbyre oekaa rupi yvy
oj'o va'e gui.

- ²² Ha'e kuery ma onhono porāa rā ovy'a 'rā okuapy,
oguerovy'a rei 'rā yvykua py ovaē vy.
- ²³ Mba'erā tu avakue pe oexa ucaa 'rā hexakā va'e
haperā oikuaa uka e'ŷ re?
Mba'eta Nhanderuete ojoko 'rā joa katy gui
e'ŷ-e'ŷ.
- ²⁴ Mba'e re tu xee ha'u va'erā 'rāgue py ajou xepy-
tuē atā aguā,
ha'e yy onhoē va'e rami ajae'o ete aguā?
- ²⁵ Mba'eta akyjea ou ma xe'áry,
aexa'āa oiko ma xere.
- ²⁶ Ndapytu'uvei, naī rivevei, neī naxekane'ōguia
kuaavei,
xepy'a reta rei aguā anho ou ramo — he'i.*

4

Jó pe Elifaz ijayvu eteague

- ¹ Ha'e ramo Temā pygua Elifaz ombovai. Ha'e vy
aipoe'i Jó pe:
- ² — Xapy'a rei amongue ndevy ijayvu ramo nerendui
'rā ri ty'y?
Ha'e rami avi mava'e tu ojejoko 'rā ijayvu e'ŷ
aguā?
- ³ Ma'ē, ndee ma mbovy e'ŷ rei rekombo'e va'ekue,
ha'e ipo kangy va'e remombaraete kuerei
va'ekue.
- ⁴ Ndeayvua py reipytyvō va'ekue onhepyxanga
va'e kuery,

* **3:26** Jó ndoikuuai raka'e mba'e re pa ojexavaia. Ha'e rami vy
ndovy'aia rupi ijayvu Nhanderuete re. Ha'e gui opaa py Nhanderuete ijayvu ixupe omo'arandua rupi, capítulo 38 guive 40 peve,
ha'e rā Jó ma nda'evei ramo ha'e rami ijayvuague re.

ha'e remombarae ju va'ekue henapy'ã
kangy va'e.

⁵ Ha'e rã aÿ ma ndere ju ha'e nunga ou ramo ndee
nerenduxei 'rã.

Ndee rejexavai vy nanderekorãvei.

⁶ Nhanderuete renonde rejererokyjea rupi ve'ÿ ri
ty'y rejerovia,
rearõ reikovya ha'e nderekko porãa rupi ve'ÿ ri
ty'y reiko?

⁷ — Nema'endu'a pota ke: Ojejavy e'ÿ va'e pa
okanhÿ 'rã?

Mamo tu heko porã va'e omombaague?

⁸ Xee aexaa rami, mba'emo vai nhotÿare kuery ma
ha'e nungakue ae ju 'rã omono'õ.

⁹ Nhanderuete ipytuẽ ramo rive ha'e kuery ikuai
axy 'rã.

Opoxya rupi oipeju rã okanhymba 'rã.

¹⁰ Ha'e ramo guary kuery voi inharõ teĩ okyrirĩ 'rã
okororõa gui,

guary ra'y kuery raĩ guive opẽmba 'rã.

¹¹ Ha'e rami vy guary kuery ikangy 'rã oje'oivy
mba'eve ndojukavei vy.

Guary kunha ra'y kuery voi opa rupi 'rã
oaĩmba.

¹² — Peteĩ ayyu aendu xee ae'ia py omombe'ua rã.
Haxy'i py aendu kuaa xeapyxa py ijayvua
mbegue rã.

¹³ Pyávy, ajexa ra'ua re aikuaa pota ete reve,
avakue oke vaipa jave

¹⁴ ou karamboae xemondyi ha'e xemboryryi-
paarã.

Xekãgue eteve voi oryryipa.

¹⁵ Ha'e ramo peteĩ nhe'ẽ oaxa xerenonde rupi.

Ha'e rami vy ojapo xe'a xerete rupi ikuai va'e
opu'āmba aguā rami.

16 Ha'e va'e opyta ho'amý va'eri ndaexa kuaai
hova.

Peteī mba'e rive ojekuaa aexaa py.

Jypy nonhendui mba'eve. Ha'e gui ma aendu
peteī aipoe'i va'e:

17 "Imarā va'e kuery nda'u heko porā 'rā Nhan-
deruete renonde?

Avakue nda'u iky'a e'ŷ va'e 'rā oiko imoin-
goare renonde?

18 Ma'ē, Nhanderuete ma guembiguai kuery re
ndojeroviai 'rā.

Mba'eta guembiguai anjo kuery re eteve voi
oikuua teko vai oĩa.

19 Ha'e rā yapo guigua py hoo va'e re katuve ma.

Ha'e kuery ma yvyku'i gui rive ojapo pyre,
ha'e tanambi rami rive ju 'rā omou'ūa.

20 Aje'ive ha'e kuery itui'i 'rā, ha'e gui ka'arukue ju
omombaa 'rā.

Okanhy 'rā raka'e rā peve guarā, avave rei
oikuua pota e'ŷ re.

21 Ha'e kuery rekove oipe'aa ramo
omano 'rā 'arandua oupity e'ŷ re", he'i.

5

Jó Nhanderuete oeka aguā re Elifaz ijayvuague

1 — Ejapukai aŷ! Ha'e rami teī oiko ri nda'u
nerenduarā?

Mava'e anjo iky'a e'ŷ va'e pe tu renhepytyvō
uka ta?

2 Mba'eta hi'arandu e'ŷ va'e ipoxya ae ombovaipa
'rā.

Inhakā porā e'ŷ va'e ivaia rive 'rā ojuka.

- ³ Xee ma aexa porā hi'arandu e'ŷ va'e onhemoingo
porā merami ramo.
Ha'e rami teĩ are'ŷ'i re aikuaa hoo oĩa ayvu
vaipy oikoa.
- ⁴ Ta'y kuery voi mombyry ikuai ipytyvoarā gui.
Tetā kora rokē py ha'e kuery ojexa ūka rā
ombopagaa,
heraa jepearā ndoikoi ramo.
- ⁵ Ha'e kuery onhotŷ va'ekue ma ijajupa rā ikuuai
va'e kuery ho'upa rive 'rā,
juu mbyte rupi henhoĩ va'ekue voi oipe'apa
'rā.
Ha'e mba'emo oguereko va'ekue ma oikuaa
pota rei va'e kuery omokanhymba 'rā.
- ⁶ Mba'eta teko axy ma yvyku'i gui rive ndoikoi,
yvy gui e'ŷ henhoĩ jajexavai aguā.
- ⁷ Ha'e rami 'rāgue py avakue ojexavai aguā rami ae
'rā itui'i,
tapyĩ gui tata raviju yvate katy ae 'rā ovevea
rami.
- ⁸ — Ha'e gui xee va'e rire ma aeka 'rāgue Nhan-
deruete,
ixupe anho amboaxa 'rāgue xerekoo.
- ⁹ Mba'eta ha'e ma ojapo 'rā mba'emo tuvixa va'e
oikuaa pyrā e'ŷ,
ha'e nhomondyipaarā omombe'u kuaa pyrā
e'ŷ.
- ¹⁰ Ombo'oky 'rā yvy áry rupi,
omoakŷ 'rā mba'ety ikuai va'e.
- ¹¹ Ha'e rami vy ogueraa jepe 'rā yvyīgue'i peteĩ
henda yvatea py,
ojae'o va'ekue oiko porāa rupi ov'y'a nho aguā.

- 12 Ha'e rā jokorea kuery onhembopy'aa ma ha'e
ombovaipa 'rā,
opo py ojapoxe va'ekue ndojapo kuaai aguā.
- 13 Ombo'a 'rā oikuaapave va'e nhombotavya py ae.
Ha'e ramo oikuaapa va'e onhembopy'aague
opa rive 'rā.*
- 14 Ha'e kuery ma ara py teī ojou 'rā pytūa anho,
kuaray mbyte jave teī pytū rupi merami ikuai,
opovyvy 'rā oje'oivy.
- 15 Nhanderuete ma jogueraa jepe 'rā ha'e kuery
juru gui kyxé oē va'e gui,
ipo'akave va'e po gui ogueraa jepe 'rā ojexavai
va'e.
- 16 Ha'e rami rā oī 'rā iporiaukue'i oarō okuapy
aguā,
ha'e rā joapo vaia kuery ma okyririmbā 'rā.
- 17 — Ovy'a ete 'rā avakue Nhanderuete
omo'arandu va'e.
Ha'e nunga rupi endu rive eme Ipo'akapave
va'e nemo'arandu rā.
- 18 Mba'eta ha'e ma nhomboai 'rā, ha'e gui ha'e ae
ju oipoano 'rā.
Nhomomba'eaxy 'rā, ha'e gui opo py ae ju 'rā
omonguera.
- 19 Seis-kue rejexavaia gui ha'e ndereraa jepe 'rā,
ha'e sete-a py voi mba'emo vai nanderupityi
'rā.
- 20 Karuai py teī ndereraa jepe 'rā remano aguā gui,
joe opu'āa py guive ndereraa jepe 'rā kyxé
po'akaa gui.
- 21 Nderepy 'rā ayvu vai gui,

* **5:13** 1 Coríntios 3.19

- ha'e ramo mba'emo mbovaipaarā ovaē rā
rexā teī nderekyjei 'rā.
- ²² Mba'emo mbovaipaa ha'e karuai oiko rā repuka
'rā,
vixo ka'aguy regua gui guive nderekyjei 'rā.
- ²³ Mba'eta yvy rupi ita ikuai va'e reve voi rejapo 'rā
peteī rami ikuai porā aguā,
mymba yvy regua voi ndereve ikuai 'rā peteī
rami.
- ²⁴ Reikuua 'rā ndero py mby'a porā oīa,
ha'e mba'emo rerekō va'e ikuiaia rupi reikuua
pota reovy rā ndoatai 'rā mba'eve.
- ²⁵ Reikuua avi 'rā neramymino kuery heta 'rāa,
ndeguigua kuery yvy re jai rogue ikuai va'e
rami 'rā heta.
- ²⁶ Ndetuja'i javē teī nembaraete reve 'rā reo yvyra
rupa py,
trigo ojokua pyre hi'ára py porā omono'ōa
rami.
- ²⁷ — Ma'ë, ha'e nunga re roikuua pota rā ha'e rami
ae.
Ejapyxaka ndee voi, ha'e nunga re eikuaa
pota avi reiko porā aguā — he'i.

6

Jó onhemboeko porāa rupi ijayvuague

- ¹ Ha'e ramo Jó ombovai:
- ² — Ai! Xeayvua re anhetē oikuua potaa va'e rire,
ha'e mba'emo opejaa py xeporiaua opejaa
va'e rire
- ³ ha'e va'e ma anhetē ita ku'i ye'ë rembe rupi ikuai
va'e gui ipoyive 'rāgue.
Ha'e nunga rupi ae xevai reve xeayvu va'ekue.

- ⁴ Mba'eta Ipo'akapave va'e ma guembiporu hu'y
py xenhyvõmba,
ha'e ramo xenhe'ẽ py aendu veneno ramigua.
Xerovai meme Nhanderuete ombou
xemongyjearã.
- ⁵ Mburika'i yvy'ãa rupigua nda'u nhuũ re okaru
reve onhe'ẽ 'rã teve?
Vaka kuery nda'u onhe'ẽ 'rã okaru porãa py?
- ⁶ Juky e'ŷ re teve ja'u 'rã he'ẽ e'ŷ va'e?
Tyrã uru rupi'a xiña re oĩ 'rã teve heea?
- ⁷ Xenhe'ẽ py nda'uxei va'ekue
aŷ ajeguaru reve teĩ ha'u.*
- ⁸ — Nhanderuete ajerurea ojapo va'e rire,
aipota va'e ha'e omoingo va'e rire!
- ⁹ Nhanderuete pe ha'eve va'e rire xemokanhy voi
aguã,
opo oupi vy xejuka ete aguã!
- ¹⁰ Ha'e nunga oiko ma va'e rire xepy'a guaxu
'rãgue,
haxy aendu temaa py teĩ apo-apo 'rãgue avy.
Mba'eta xee ma Iky'a e'ŷ va'e ayvu rovai
xeayvu va'e'ŷ.
- ¹¹ — Mba'e tu arõve ta, xembaraete vy e'ŷ?
Mba'erã tu aikove riae ta, amano aguã rami
tema aiko vy?
- ¹² Xembaraetea nda'u ita rami hatã va'e?
Xero'o nda'u overa va'e guigua rami hatã va'e?
- ¹³ Any! Naendui ae xepytyvõarã.
Xegui oipe'apaa ma xembaraeterã va'ekue.
- ¹⁴ — Ojexavai va'e pe irũ kuery omboaxya'i oexa
uka va'e rire,

* **6:7** Apy tembi'u hee e'ŷ va'e re Jó ombojoja, ojexavaia re ijayvu vy.

Nhanderuete renonde ojererokyjea gui
ojepe'a e'ŷ rā.

15 Ha'e rā xeryvy kuery ma anhetē rupi e'ŷ xereko.

Ha'e kuery ikuai peteĩ yakā oxyry atā vy
hembe rupi oĩa rami

16 yro'y oguerooxyry reve,
yro'y apĩ hyku ovy jave,

17 ha'e rami teĩ haku jave oxyry atā va'ekue typa
rive va'e rami,
ndaevovovei ha'e oxyryague rupi ndoxyryvei
va'e rami.

18 Ha'e ramo oguata va'e kuery yy rekaa rupi
ojepekuavo 'rā jogueravy tape oo aguã
va'ékue gui,
ha'e vy tekao e'ŷa katy oje'oi vy omanomba 'rā
ha'e py.

19 Temá yyvui gui oguata va'e kuery oeka teĩ yy
oxyry atā va'e,
Sabá gui oguata va'e kuery voi iporiaupa 'rā
yy re.

20 YY oĩ aguã re ojerovia va'ekue oximba 'rā okuapy.
Oxyryague py ovaẽ vy ndoikuaavei rei 'rā
okuapy.

21 Ha'e rami ae peẽ kuery voi xevy pe mba'everã
ovare e'ŷ va'e pendekuai.

Mba'eta ajexavai rā pexa vy penhemondyipa
rive.

22 Xee nda'u aipoa'e: “Peme'ẽ ke mba'emo xevy”,
ha'e teve?

Tyrā pa “Peme'ẽ mba'emo perekva'e xepy-
tyvõ aguã”, ha'e teve?

23 “Xereraa jepe ke xemoingo axya po'akaa gui”,

- e'ŷ vy "Xerepy ke porayvu e'ŷ va'e kuery po
gui", ha'e teve p̄evy?
- 24 — Xerekombo'e na, ha'e rā xee akyrirī'rā.
Pemombe'u porāve na mba'e nunga py pa
ajeavyague.
- 25 Anhetē ayvu ha'evea ramigua ma oenduxe vai
pyrā meme!
Ha'e rā peē kuery ma mba'erā tu pendeayvu
ete xevy?
- 26 Peē kuery xemongetaxe ri ty'y xeayvua re,
peteī ndaekorāvei va'e yvytu pe rive ijayvu
va'e rami xeayvu rire?
- 27 Tyre'ŷ kuery re teve pexa 'rā xortea,
ha'e pejogueroayvu 'rā teve peneirū repyrā
re?†
- 28 Ha'e gui aŷ peē kuery xemboaxy'i ri vy pema'ẽ
porā xere,
ha'e pexa penerenonde ndaxeapuia.
- 29 Peikuaa pota ju ke, ajerure p̄evy, ha'eve'ŷa rami
xekuaa e'ŷ aguā.
Peikuaa pota ju, ha'e vy peikuaa 'rā ha'evea
rami aïkao.
- 30 Xeayvua py teve ha'eve'ŷa ramigua pendu?
Xejuru py ha'eve'ŷ va'e re xeayvu va'e rire
nda'u xee voi ndaikuaai 'rāgue teve?

7

Nhanderuete pe Jó ijayvuague

- 1 — Yvy re avakue ojexavai aguā rami e'ŷ teve
ikuai?

† 6:27 Apy Jó ijayvu oirū kuery nomboaxyia re.

- Oikovea ára omba'eapo va'e rami e'ŷ teve
ojexavai?
- ² Escravo kuaray'ã oeka teĩ va'e rami,
ha'e omba'eapo va'e opagaa aguã oarõ va'e
rami,
- ³ xevy pe ha'e rami ae avi ome'ëa mba'erã e'ŷ aiko
aguã jaxy nhavõ re,
ha'e pytû aiko axy aguã ome'ëa avi.
- ⁴ Anheno vy aipoa'e: "Mbovy hora nda'u ha'eve 'rã
avy ju aguã?"
Ha'e rami teĩ pytû ipuku ramo
xerupa rupi ajere-jere tema ajupy ko'ẽ peve.
- ⁵ Xero'o re oĩ taxo ha'e pekue vaikue.
Xepire re ipekue oĩ va'e gui ipeu jepi.
- ⁶ Xe'ára ma mba'emo mbovyvya gui ipojavave,
ha'e vy opa 'rã arõ e'ŷkue re.
- ⁷ Nema'endu'a ke xerekovea yvytu rami rive
oaxapa vyvoia re.
Xerexa ndoexavei ma 'rã iporã va'e.
- ⁸ Aŷ xerexa okuapy va'e ma ndaxerexavei ma 'rã.
Ha'e kuery rexa oxareko rei teĩ xee nda-
jekuaavei ma 'rã.
- ⁹ Arai ivaipa reve oaxa va'e rami avi
onhono porã mbyre noëvei 'rã.
- ¹⁰ Ha'e kuery ndojevyvei 'rã ngoo katy,
ikuaiague py ae teĩ ha'e kuery re
na'ima'endu'aavei ma 'rã.
- ¹¹ — Ha'e nunga rupi ae xee ndajokoi xejuru.
Ha'e rami vy xeayvu 'rã xenhe'ë py ajexavaia
aendu va'e re,
anhemombe'u 'rã xerekove re ajexavaia rupi.
- ¹² Xee nda'u ye'ë, e'ŷ vy vixo ye'ë rupigua teve,
ndee xerarõ uka aguã?

- ¹³ Xee aipoa'e: “Xerupa py aĩa py avy'a 'rã,
 xerupa py apytu'u 'rã ajexavaia re xeayvua
 gui”, ha'e.
- ¹⁴ Ha'e rami teĩ ndee xemondyi 'rã mba'emo aexa
 ra'u va'e gui,
 xemongyje aexa merami va'e gui.
- ¹⁵ Ha'e nunga rupi xenhe'ẽ pe ha'eveve 'rãgue xe-
 jyryvipyta va'e rire.
 Aiko axy 'rãgue py ha'eveve amano aguã.
- ¹⁶ Xevy pe ha'eve ma aikovea.
 Raka'e rã peve xee ndaikovexei.
 Xereja ha'vy, mba'eta xe'ára ma yvytu rami
 rive oakapa vyvoi.
- ¹⁷ Mba'e nunga tu avakue ikuai rejou porã aguã,
 ha'e kuery re repena aguã?
- ¹⁸ Mba'eta ára nhavõ reju reikuua pota aguã,
 ha'e hora nhavõ 'rã rexaa pota.
- ¹⁹ Raka'e peve tu ndereipe'ai 'rã nderexa xegui?
 Raka'e peve 'rã nda'evei xerendyry amokõ
 aguã?
- ²⁰ Xapy'a rei ajejavy vy mba'e nunga ha'eve'ŷ va'e
 tu ajapo ndevy,
 ndee avakue re reikuua pota va'e?
 Mba'e re tu xeapo hu'y rea'anga aguã,
 xejeupe ae ipoyi va'e apyta aguã rami?
- ²¹ Mba'e re tu neremboguei xerekovaia,
 ha'e ndereipe'ai ajejavyague?
 Mba'eta aŷ ha'a ta ma yvy rupi.
 Ha'e va'e rire ndee xerekovaia vy ndaxejouvei ma
 'rã — he'i.

- ¹ Ha'e ramo Sua pygua Bildade ombovai:
² — Raka'e peve 'rã tu pova'e nunga re ndeayvu?
 Raka'e peve 'rã tu ndejuru gui ndeayvuẽ
 yvytu atã va'e rami rive?
³ Nhanderuete nda'u ha'eve'ÿa rami 'rã oikuaa
 pota?
 Ipo'akapa va'e nda'u gueko porãa rupi e'ÿ 'rã
 nhanderereko?
⁴ Hovai ndera'y kuery ojejavy rire
 omombo ma ojejavyague re opaga aguã py.
⁵ Ha'e rami avi xapy'a rei ndee Nhanderuete reka
 'rã,
 ha'e Ipo'akapa va'e pe nemboaxy aguã re re-
 jerure rã,
⁶ xapy'a rei nandeky'aia ha'e nderekko porãa rupi
 ri reiko ramo,
 are'ÿ re ha'e onhemoi 'rã nepytyvõ aguã,
 ha'e vy nemoi ju 'rã nderekko porãa ojekuaa
 porã aguã py.
⁷ Jypy reikoague py ma anhetẽ ne'yvy'íi va'ekue,
 ha'e rã opaa py ma ndeyvate ete 'rã.
⁸ — Ha'e gui aÿ ma xee ajerure ndevy, eporandu
 na ymagua kuery rekokue re,
 eikuuaa pota neramoí kuery ikuaiague re.
⁹ Mba'eta nhande ma kue'ive guare jaiko vy
 mba'eve ndajaikuuai.
 Ha'e nhande'ára yvy re jaikoa ma kuaray'ã
 rami oaxa ový va'e.
¹⁰ Neramoí kuery nanembo'ei ri ty'y,
 ha'e kuery nanemongetai ri ty'y?
 Ha'e vy ha'e kuery ae o'arandua rupi
 nomombe'ui ri ty'y po rami?

- 11 Mba'eta papiro renhoï ma yapo py anho 'rã
yvate,
juncu renhoï guive yy py anho 'rã oiko porã.
- 12 Ha'e va'e nunga ipyau teri reve ojaya a e'ŷ re teĩ
amboae jai rogue gui ipiru voive 'rã.
- 13 Ha'e rami ae avi ikuai Nhanderuete gui hexarai
va'e kuery ha'e javi.
Mba'eta heko vai va'e kuery mba'emo oarõ
okuapy va'e opa rive 'rã.
- 14 Ha'e kuery oĩ atã merami teĩ opa xapy'a 'rã,
ha'e kuery ojeroviaa ma nhandu kya rami
rive 'rã ivaipa.
- 15 Ikya re amongue ojeko rã oxopa 'rã.
Ha'e va'e re amongue ojopy rã ivaipa rive 'rã.
- 16 Ha'e kuery ma ikuai kuaray py mba'emo rogue
oiko porã vy
yvotyty ha'e javi rupi hoky pojava va'e rami.
- 17 Hapo ma onhemamamba 'rã ovy ita ijaty oupy
va'e áry rupi,
henhoï vy oike 'rã kora hi'aĩ va'e re voi.
- 18 Ha'e rami teĩ xapy'a rei oĩague gui Nhanderuete
omondoro ramo
oĩague py ae teĩ hexe na'ima'endu'aavei ma 'rã.
- 19 Ha'e rami rire hekove mba'everã ndovarei!
Ha'e gui yvy ku'i py henhoïague gui amboae ju
'rã henhoï.
- 20 — Ha'e rã anhetẽ rupi ipy'a va'e kuery ma
Nhanderuete ndoejai 'rã,
nomboaxai 'rã guive heko vai va'e kuery po
py.
- 21 Ha'e ma ndejuru py omoï 'rã nderory nho aguã,
nerembe re omoï 'rã revy'a aguã.

²²Ha'e rã ndejojai reiare kuery ma ojee ae omoĩ'rã
oxĩmba reia.
Heko vai va'e kuery ro okanhymba 'rã — he'i.

9

Nhanderuete pe Jó nombovai kuaia rami ijayvuague

- ¹ Ha'e ramo Jó ombovai vy aipoe'i:
- ² — Anhetẽ, xee voi aikuaa rã ha'e rami ae.
Ha'e rami teĩ marã rami vy 'rã tu avakue onhemboeko porã Nhanderuete renonde?
- ³ Mba'eta xapy'a rei hexeve avakue nhombojovake ramo
mil-kue oporandua regua neĩ peteĩve ma nombovai kuaai 'rã.
- ⁴ Ha'e ma opy'a py oikuaapa ha'e ipo'akapave va'e.
Mava'e tu hexe opu'ã reiague gui oo porã ju 'rã?
- ⁵ Ha'e ma oipe'a 'rã yvyty ikuai va'e oikuaaa okuapy e'ŷ re.
Opoxya py ombovaipa 'rã.
- ⁶ Ha'e ma yvy omomyĩ vy oguerova 'rã oĩa gui,
ha'e ramo ijyta oĩ va'e oryryipa 'rã.
- ⁷ Kuaray pe ha'e ijayvu rã ndojopevei 'rã.
Omo'ã 'rã guive jaxy-tata ikuai va'e.
- ⁸ Ha'e ae'i oipyo va'ekue yva,
ha'e ye'ẽ áry rupi oguata 'rã oikovy.
- ⁹ Ha'e ma jaxy-tata apoare: Ursa, Hendy guaxu va'e,
Eixu, jaxy-tata kuaray ijapu'a'ia katy ikuai va'e guive.
- ¹⁰ Ha'e ma mba'emo tuvixa va'e oikuaapy e'ŷ apoa,
mba'emo porã omombe'u kuaapy e'ŷ guive.

- ¹¹ Ma'ẽ, xapy'a rei xeyvy'iry rupi ha'e oaxa rã xee
 ndaexai 'rã.
 Xerenonde rupi ete oiko teĩ xee ndaikuaai 'rã.
- ¹² Mba'emo ha'e oipe'a ta ramo mava'e tu ojoko 'rã?
 Mava'e tu aipoe'i 'rã ixupe: "Mba'e tu rejapo?"
- ¹³ — Nhanderuete ma nomboaxa rivei 'rã opoxya.
 Ha'e ramo henonde rupi ojero'a 'rã okuapy
 Egito pygua pytyvõa kuery.
- ¹⁴ Ha'e ramo mba'exa tu xee ambovai ta?
 Mba'exa tu aikuua 'rã xeayvurã, hexeve
 ajogueroayvu aguã?
- ¹⁵ Xee xerekoo porã va'e rire teĩ ixupe ma ndax-
 eayvu kuaai 'rãgue.
 Ha'e rami 'rãgue py xemboayvuarã pe ajerure
 'rãgue xemboaxy aguã re.
- ¹⁶ Hery rupi ajapukai rã ombovai teĩ
 xee aikuua 'rã noendui 'rã ajerurea.
- ¹⁷ Mba'eta xemou'ũ yvytu atã va'e py,
 ha'e mba'e re'ŷ xemoingo axyve tema.
- ¹⁸ Ha'e ndoejai xepytuẽ aguã rive.
 Ha'e rami 'rãgue py xere ombou xerekoo ax-
 yarã.
- ¹⁹ Xapy'a rei ipo'akaa re aikuua potaxe ramo ma
 ha'e aipoe'i 'rã: "Apy ma aĩ."
 Ha'e gui anhemboeko porãxe ri ramo "Mava'e
 tu xerenoĩ?" he'i 'rã.
- ²⁰ Xee ma heko porã va'e aiko va'e rire teĩ xeayvu
 py ae rive 'rãgue aexa uka xerekoo vaia.
 Anhetẽ rupi xepy'a teĩ ae ma ha'e xekuaa 'rã
 otekoavy va'e rami.
- ²¹ — Ha'e rami avi xee ma anhetẽ rupi xepy'a va'e,
 xenhe'ẽ py ndajeayvuveikue py aiko,
 neĩ xerekove re ae ma voi napenai.

- 22 Xevy pe ma opa mba'e peteñ'i rami meme
merami.
Ha'e rami vy aipoa'e: "Ha'e ma joo rami 'rã
omomba anhetẽ rupi ipy'a va'e ha'e heko
vai va'e", ha'e.
- 23 Mba'emo vai jojuka xapy'a ramo
ha'e ojojai 'rã ojejavý e'ý va'e ojexavai rã.
- 24 Heko vai va'e kuery po py omboaxaa ma yvy
teñ Nhanderuete omo'ã joguerekoa kuery
rova.
Ha'eý ri ha'e nunga moingoa oiko ramo
mava'e tu omoingo?
- 25 — Xe'ára aikoa ma onha va'e gui oaxa pojavave.
Oaxa vyvoi, ha'e rã ndaexai xembovy'aarã
va'ekue.
- 26 Oaxa pojava ovv kanoã jai rogue gui ojapo pyre
rami,
ha'e taguato vixo'i re oguejy xapy'a va'e rami.
- 27 Xapy'a rei xee aipoa'e 'rã: "Xee xerexarai 'rã
ajexavaia re,
ajepe'a 'rã xeporiaua gui, ha'e vy avy'a 'rã",
ha'e.
- 28 Ha'e rami va'e rire teñ haxy aendu va'e xe-
mongyje teri 'rãgue,
mba'eta aikuua porã ndee xekuaa 'rã heko
porã va'e rami e'ý.
- 29 Ha'e rami vy xembopaga 'rãe.
Ha'e ramo mba'erã tu anhea'ãve ta?
- 30 Xapy'a rei yro'y rykukue py ajau,
ha'e kavõ py xepo aiky'a'o
- 31 teñ ndee yapo py ju 'rã xemombo.
Ha'e ramo xeao ae voi ojapo 'rã xegui
ojeguarua aguã rami.

- 32 Mba'eta Nhanderuete ma xee ramigua ava e'ŷ oiko.
 Ha'e rami e'ŷ va'e rire xee ambovai 'rāgue oremboayvu aguã katy rojoguerua rupi ma voi.
- 33 Ndoikoi orembyte ore mokoĩve re opo omoĩ va'erā.
- 34 Xe'áry rupi gui yvyra po'i'i ha'e oipe'a,
 ha'e naxemongyjevei ma va'e rire
- 35 ha'eve 'rāgue akyje e'ŷ re xeayvu aguã.
 Ha'e rami e'ŷ rā nda'evei xevy.

10

Nhanderuete rovai Jó ijayvuague

- 1 — Xenhe'ẽ py ndarovy'avei ma xerekove.
 Xeayvu 'rā ndavy'aia ha'e javi re,
 xenhe'ẽ py ajexavaia aendu reve 'rā xeayvu.
- 2 Aipoa'e 'rā Nhanderuete pe: “Xembopagave eme.
 Eikuua uka porā ke mba'emo vai xere rejou va'e.
- 3 Ndee nda'u xembojexavaixe vai ri?
 Mba'eta reja merami neremimoingo ndepo py ae rejapo va'ekue.
 Tyrā pa heko vai va'e kuery onhembopy'aa rive rejou porāve?
- 4 Ndee voi teve to'o guigua nderexa va'e?
 Avakue oexaa rami ae avi teve ndee voi rejoexa?
- 5 Imarā va'e kuery oikoa ára rami teve nde'ára voi oī?
 Ha'e ndee reikoa ma'etŷ teve avakue oikoa ma'etŷ rami,
- 6 xerekoo vaia re reikuua pota aguã,

- ha'e ajejavya re rexā pota aguā?
- ⁷ Ndee ma reikuaa porā ojejavvy va'ety e'ŷ aikoa.
 Ha'e rami teī ndoikoi ndepo gui xereraa jepearā.
- ⁸ Ndepo py ae xemboypy ha'e xeapopa va'ekue.
 Aŷ ma xemombaxe ju.
- ⁹ Nema'endu'a ke yapo gui rive xeapoague re.
 Ha'e rā aŷ ta'vy yvy ku'i ju xemoingoxe?
- ¹⁰ Kamby rami e'ŷ teve renhoē xerekove,
 ha'e kamby kekue rami rive teve xeapo?
- ¹¹ Xepire ha'e xero'orā py xemonhemonde,
 ha'e gui xekāgue ha'e xerajyrā reipopē va'ekue.
- ¹² Xerekoverā reme'ẽ va'ekue ndeporayvua rupi,
 ha'e xere repenaa rupi xerarō va'ekue.
- ¹³ Ha'e nunga renhomī nekuraxō py.
 Va'eri aikuaa porā po rami renhembopy'aa.
- ¹⁴ Xapy'a rei ajejavvy ramo ndee reikuaa pota 'rā.
 Ha'e rami vy neremboguei 'rā xerekovo vaiague.
- ¹⁵ Xapy'a rei xerekovo vai ramo nda'evei ete 'rā xevy!
 Ha'e rami avi xerekovo porā vy ma nda'evei avi
 xekā amopu'ā aguā,
 mba'eta axīmba reve anho aexa
 xeporiaukuea.
- ¹⁶ Mba'eta xekā amopu'ā ramo ndee xembo'a 'rā
 guary inharō va'e rami.
 Ha'e vy xerovai rexā uka ju 'rā ndepo'akapaa.
- ¹⁷ Rembou ju 'rā xerovai ijayvu va'erā,
 ha'e remboeta 'rā xerovai ndevaia.
 Mba'emo vai anho rembou 'rā xere opu'ā
 va'erā.
- ¹⁸ Mba'erā tu ha'vy xerenoē raka'e ha'i rye gui?
 Ai! Avave xerexa e'ŷ re amano ma voi va'e rire

- ¹⁹ xee ndaikoi ma voiague rami 'rāgue aī,
 ha'e xeryru'i py aīa guive xereraa 'rāgue xen-
 hono porāa aguā katy.
- ²⁰ Mbovy'i e'ŷ teve oī xe'ára?
 Epytu'u ke ha'vy, xereja,
 xapy'a'i ri jepe xekane'õgua aguā,
- ²¹ ha'e xee aa e'ŷ mbove peteī henda ha'e gui ajevy
 ju e'ŷa katy,
 yvy pytūa ha'e manoa'ā oīa py,
- ²² yvy huū reia, pytū etea,
 yvy manoa'ā ha'eve'ŷa ramigua anho oīa,
 hendy va'e eteve voi pytūa py", he'i.

11

Jó ojejavya rami Zofar ijayvuague

- ¹ Ha'e ramo Naamá pygua Zofar ju ombovai:
² — Nanembovaiai 'rā ri ty'y po rami ndeayvu reta
 rei rā?
 Ha'evea rami teve reiko ndeayvu kuaa etea
 py?
- ³ Ndeayvu reta rivea gui teve avakue okyrirī 'rā?
 Ha'e rā ndee rejajai 'rā teve avave rei
 nemoximbaa ju e'ŷ re?
- ⁴ Mba'eta aipo're: "Xee ma anhetēgua meme
 aikuua va'e,
 ha'e nerentonde iky'a e'ŷ va'e aiko", 're
 va'ekue.
- ⁵ Ai! Nhanderuete ijayvu ma va'e rire,
 nderovai ojuru oipe'a va'e rire,
- ⁶ omombe'u porāve 'rāgue 'arandua ndoikuua ukai
 teri va'e,
 mba'eta hi'arandua ma anhetē va'e meme, joo
 rami e'ŷ-e'ŷ oikuua uka tei.

- Ha'e rami teĩ reikuua pota pova'e re:
 Amongue henda py Nhanderuete neĩ
 ndoikuaa potai rejeyavya ha'e javi re.
- ⁷ — Ndee teve reikuua 'rã Nhanderuete mba'emo
 oikuua uka e'ŷ va'e?
 Reikuua pota ta teve Ipo'akapa va'e re oĩ va'e
 ha'e javi re?
- ⁸ Mba'eta hi'arandua ma yvatea rupi peve oo.
 Mba'e tu ndee rejapo kuaa ta?
 Hi'arandua ma yvykua vaikue gui ipy pukuve
 va'e.
 Mba'e tu ndee reikuua ta?
- ⁹ Ko yvy gui eteve voi ipukuve va'e,
 ha'e ye'ẽ gui ipyve va'e.
- ¹⁰ Xapy'a rei ha'e oaxaa rupi amongue ombo'a vy
 omboayvu aguã katy ogueraa ta ramo mava'e
 'rã tu ojoko?
- ¹¹ Mba'eta ha'e ma oikuua avakue ovare e'ŷ va'e
 ha'e javi,
 oexa pota e'ŷ re oexa ma voi 'rã heko vaia.
- ¹² Ha'e gui ava hi'arandu e'ŷ va'e onhemoingo
 kuaa 'rã teve hi'arandu va'e?
 Mburika'i yvy'ã rupigua ra'y ava ojeapo kuaa
 ramo mae ha'e nunga ha'eve.
- ¹³ — Xapy'a rei nekuraxõ rerova vy
 Nhanderuete pe ndepo reupi,
- ¹⁴ xapy'a rei ndepo py rejapo vaiague mombyry
 remombo,
 ha'e ndero gui ha'eve'ŷa ramigua reipe'a vy,
- ¹⁵ ha'e rami vy mae nderova reupi 'rã ndeky'a e'ŷ
 reve,
 ha'e reĩ atã 'rã mba'eve nemongyjeve e'ŷ re.
- ¹⁶ Ha'e rami vy nderexarai 'rã rejexavaiaque re,

ha'e nungakue re nema'endu'a teĩ yy oxyry
ovy va'ekue re rami rive.

¹⁷ Reikoa ma kuaray mbyte jave hexakāa gui hex-
akāve 'rā.

Pytū oña py teĩ ko'ëa rami 'rā ndevy.

¹⁸ Renhenhandu porā 'rā, mba'eta oï ju 'rā rearō
reikovy aguã.

Ndeyvýry rupi rema'ë ma vy reke porā 'rā.

¹⁹ Renheno rejupy ramo avave rei nanemondyi
'rā.

Heta 'rā ou ndevy onhepytyvõ uka vy.

²⁰ Ha'e rā heko vai va'e ma ndaexa pyxovei 'rā,
ha'e kuery onhemi aguã va'ekue ivaipa 'rā.

Ha'e kuery oarō okuapya ma ojeapo 'rā inhe'ë
okanhy aguã rami rive — he'i.

12

Oirũ kuery ijayvuague Jó ombovaiague

¹ Ha'e ramo Jó ombovai:
² — Peẽ kuery anho ma nhi'ã avakue peiko,
ha'e pemano ramo ndoikovei 'rā hi'arandu
va'e.

³ Ha'e rami avi xee voi peẽ rami xe'arandu va'e.
Xee ma pendegui xe'yvyïve va'e'ŷ.
Mava'e tu ndokuuaai 'rā ha'e ramigua?

⁴ Ha'e gui xee ma xeirũ kuery xejojai rei va'e aiko,
Nhanderuete pe ajapukai rā xembovai teĩ.
Mba'eta heko porā ha'e ha'evea rami ikuai
va'e ma ojojai rei pyrā meme ae ikuai.

⁵ Iporiau e'ŷ va'e kuery oikuua rā iporiaukue'i ojou
vaipy ikuai.

Ha'e rami vy ha'e kuery omoanha-anha 'rā
ho'a rai'i va'e oityxe vy.

- 6 Porayvu e'ŷ va'e kuery ikuiaia py ovy'apa rei 'rã,
 Nhanderuete re ijayvu rei va'e kuery ma ipo-
 riau e'ŷ va'e meme merami.
 Ha'e kuery nguueterã rami oguereko opo
 mbaraetea rive.
- 7 — Ha'e rami teĩ eporandu na aŷ mymba ikuai va'e
 pe.
 Ha'e rã ha'e kuery nembo'e 'rã ha'e nunga re.
 Guyra oveve va'e pe reporandu rã ha'e kuery
 oikuua uka 'rã ndevy.
- 8 Ha'e rami e'ŷ vy eporandu na yvy pe,
 ha'e ramo nembo'e 'rã.
 Pira ye'ẽ rupigua voi omombe'u porã 'rã
 ndevy.
- 9 Mava'e nda'u ha'e va'e kuery regua ndoikuuaai 'rã
 SENHOR opo py ha'e nunga ojapopaague?
- 10 MBA'eta opo py oguereko guemimoingo kuery
 ha'e javi,
 avakue ha'e javive nhe'ẽ guive.
- 11 Xeapyxa py nda'u naendu kuaa potai 'rã ayvu
 aendu va'e,
 xejuru py tembi'u heea aendua rami avi?
- 12 Tyrã pa tujakue'i re anho teve oĩ 'arandua?
 Oikove puku va'ekue re anho teve oĩ mba'emo
 oikuua aguã?
- 13 — Any! Nhanderuete re ae oĩ 'arandua ha'e
 mbaraetea.
 Hexe ma oĩ nhomongeta ha'e mba'emo
 oikuuaapa aguã.
- 14 MBA'emo ha'e oity va'ekue ma nomopu'ãavei 'rã.
 Nhuã py ha'e ombo'a va'ekue avave rei
 ndoipe'a kuaai 'rã.
- 15 Yy ha'e ojoko ramo opa mba'e ipirupa 'rã.

- Ha'e rã yy ha'e ombou ramo ombovaipa 'rã
yvy.
- ¹⁶ Hexe anho oĩ mbaraetea ha'e 'arandua.
Ombotavy pyre ha'e imbotavya ma ha'e
oguerekova'e meme.
- ¹⁷ Oipe'a 'rã nhomongeta va'ety kuery nhomonge-
taague gui,
nhomboayvua kuery voi ojapo 'rã na'inhakã
porâvei aguã rami.
- ¹⁸ Ombovaipa 'rã huvixave kuery po'akaa,
ha'e omoxã uka 'rã heravy iku'a rupi.
- ¹⁹ Sacerdote kuery ma ha'e oipe'a 'rã sacerdote
ikuaiague gui,
ha'e iporiau e'ŷ va'ekue ma oitypa vyvoi 'rã.
- ²⁰ Ijayvu kuaa va'e kuery gui ha'e oipe'a 'rã ayvu,
ha'e tujakueve gui ma oipe'a 'rã hi'arandua.
- ²¹ Yvatekueve re omoĩ 'rã nomboeteavei aguã,
ha'e ojora 'rã imbaraete va'e kuery ku'akuuaa.
- ²² Pytũ reia gui oexa uka 'rã mba'emo ndikuuaai
pyre,
pytũ ana eteve voi ogueru 'rã omoexakã aguã
katy.
- ²³ Yvy regua kuery ha'e omboetave 'rã, ha'e gui
omokanhymba ju 'rã.
Omoaĩmba 'rã, ha'e gui omboatypa ju 'rã.
- ²⁴ Yvy regua yvatekueve gui oipe'a 'rã 'arandua,
ojapo 'rã tekao e'ŷ rupi oguata rei aguã rami,
tape rupi e'ŷ.
- ²⁵ Ha'e ramo pytũ reia rupi ha'e kuery opovyvvy 'rã
oje'oivy hendy va'e ndoguerekoi vy,
ojapo 'rã oka'u va'e rami ho'a-o'a oje'oivy aguã
rami.

13

Jó anhetē va'e rupi oikoa re ijayvuague

- ¹ Ma'ẽ, ha'e nunga ha'e javi xerexa oexa ma,
xeapyxa voi oendu ramo xee aikuua ae ma.
- ² Peẽ kuery peikuua rami ae avi xee voi aikuua.
Xee ma pendegui xe'yvyi've va'e'ŷ.
- ³ Ha'e rami avi Ipo'akapa va'e pe anho 'rã an-hemombe'u,
Nhanderuete renonde ae anhemboeko porã ukaxe.
- ⁴ Mba'eta peẽ ma anhetēgua 'rãgue py apu rive pemoī.
Peẽ kuery ha'e javi ma poropoanoa mba'everã ovare e'ŷ va'e rami peiko.
- ⁵ Peẽ pekyririmba vyvoi va'e rire!
Ha'e rami vy 'rãe pexa uka pene'arandua!
- ⁶ Aŷ ma pejapyxaka xerekamombe'u rã,
pendu pota xejuru py mba'emo re xeayvua re.
- ⁷ Penhombotavya rupi nda'u pendeayvu ta Nhan-deruete pemboete ukaxe vy?
Pemboete ukaxe vy ri nda'u pendeayvu ta apu rupi?
- ⁸ Ixupe vy ae nda'u peikuua potaa py peteĩ peayvuve ta joegui?
Ha'e rami ri ty'y peipytyvõ ta Nhanderuete?
- ⁹ Peẽ kuery re ha'e oikuua pota va'e rire nda'u peo jepe 'rãgue?
Ha'e rami e'ŷ vy pembotavy kuaa 'rã teve,
amongue va'e rei pembotavya rami?
- ¹⁰ Joegui peteĩ peayvuve nhemi ramo
pendevy pe ijayvu atã 'rã.
- ¹¹ Napanemongyjei 'rã teve guexakãmbaa py?

- Pende'áry nomboui 'rã teve penemongyjearã?
- ¹² Pendeayvu jepiaty ma ayvu tanhimbu ramigua rive,
penhemboytaa ma yapo guigua rive.
- ¹³ — Pekyrirĩ ranhe ke xerenonde, xee ju xeayvu aguã.
- Ha'e va'e rire xere toiko oiko va'e rei.
- ¹⁴ Xeayvu ta xeraĩ py xero'o areko reve,
ha'e xerekove xepo py ajopy reve.*
- ¹⁵ Mba'eta anhetẽ ri ha'e ma xejuka ta ramo ndarekovei arõ aguã.
- Ha'e rami teĩ ae ma xeayvu 'rã xerekore.
- ¹⁶ Ha'e rami aiko vy aikuaa aa jepe aguã,
mba'eta heko vai va'e ma ndojexa ukai 'rã henonde.
- ¹⁷ Pendu pota ke xeayvua re,
pejapyxaka amombe'u va'e re.
- ¹⁸ Areko katu porãmba ma xerekore amombe'u aguã.
Aikuaa porã guive Nhanderuete xemboeko porã aguã.
- ¹⁹ Mava'e tu xereve ijayvu ete 'rã?
Ha'e rami oiko ramo xee akyrirĩ 'rã, ha'e xenhe'ẽ amondouka 'rã.
- ²⁰ Eme'ẽ xevy po rami mokoĩ ete'i ajerurea.
Ha'e rami ri rã nanhemivei 'rã nderova gui.
- ²¹ Eipe'a ke ndepo xegui,
ha'e xemonyive eme xemongyjea py.
- ²² Ha'e gui eporandu xevy, ha'e rã xee rombovai 'rã.
Ha'e rami e'ŷ vy xee ranhe taxeayvu, ha'e gui ndee ju xembovai 'rã.
- ²³ — Mbovy henda py tu xerekore vai ha'e ajejavy?

* **13:14** Apy ma ndojeayvuveikue py Jó ijayvu.

- Emombe'u porã ke xereko vaia ha'e ajejavya.
- ²⁴ Mba'e re tu nderova remo'ã
nderovaigua rami xererekoy vy?
- ²⁵ Remongyje ta teve yvyra rogue yvytu
ogueroveve heravy va'e rive?
Remonha ta teve jai rogue pirukue?
- ²⁶ Mba'eta xerovai rembopara mba'emo ipoyi va'e,
xekunumi reve ajejavague reikuaa vy.
- ²⁷ Ha'e rami vy xepy remboty yvyra pa'ũ py,
reikuaa pota aikoa ha'e javi re.
Xejoko imoiny aẽ e'ŷ aguã,
- ²⁸ mba'emo ru'ûgue opa ovya va'e,
e'ŷ vy ajukue vixo'i ho'upa va'e rami aiko teĩ.

14

Nhanderekove oaxa pojava ovya re Jó ijayvuague

- ¹ — Kunhague gui itui'i va'ekue ma xapy'a'i 'rã
ikuai,
ha'e kuery re oĩ ojexavai aguã anho.
- ² Itui'i 'rã yvoty ixorĩ va'erã rami rive.
Kuaray'ã rami okanhy vy ndojekuaavei 'rã.
- ³ Ha'e ramigua avakue re ri ty'y reikuaa pota ta,
ha'e nerentonde remboayvu ta?
- ⁴ Mava'e nda'u ha'eve'ŷa gui oguenoẽ kuaa ta
mba'emo ha'eve va'e?
Avave rei.
- ⁵ Ha'e kuery ikuai aguã ára reipapa ma voi imoiny,
ndereve ae oĩ mbovy jaxy pa ikuai aguã.
Avakue rekove rejoko rire
ha'e va'e rovai ndoaxai 'rãe.
- ⁶ Ha'e kuery re ema'ẽve eme ikane'õgua'i aguã,

- omba'eapo va'e rami o'ára opaa py ov'y'a'i
aguã.
- ⁷ — Mba'eta yvyra voi oguereko oarõ aguã,
mba'eta ojaya ma teĩ hoky jevy nho 'rã,
mbovy rei e'ý 'rã ikuai henhoĩ ju va'ekue.
- ⁸ Yvy re hapo inhyma ramo,
ha'e yvy py hi'y ipiru ramo
- ⁹ yy reakuã gui rive ju 'rã henhoĩ.
Ha'e rami vy hapo ju 'rã ov'y yvyra ipyau va'e
rami.
- ¹⁰ Ha'e rã avakue ma omano ma vy itui tema 'rã.
Avakue omano rire mamo tu opyta?
- ¹¹ Yupa py yy oĩ va'ekue typa,
ha'e yakã typa vy ipiru va'e rami,
- ¹² ha'e rami ae avi avakue onheno vy nopus'avei ma
'rã.
Yva oime teria ja nomyïvei 'rã,
okeague gui nombovya jevyi 'rãe.
- ¹³ Xenhono porãa ma ramo ndee xemo'ã 'rãgue,
xenhomí 'rãgue ndepoxyá ára oaxa peve!
Ha'e gui peteĩ ára rea'anga 'rãgue
xere nema'endu'a ju aguã!
- ¹⁴ Avakue omano ma rire nda'u ov'y ju 'rã ri?
Ha'e rami rã xee amba'eapo poyi aikovya
pukukue re arõ 'rã aikovy
xerekoviärä ovaẽ peve.
- ¹⁵ Ndee xerenoĩ 'rã, ha'e rã xee ma rombovai 'rã.
Rexaxe ju 'rã neremimoingo ndepo py rejapo
va'ekue.
- ¹⁶ Ha'e rami vy reipapapa 'rã aguataa,
ha'e nanema'endu'avei 'rã ajejavyague re.
- ¹⁷ Xerekovo vaiague re nderekoxarai 'rã voxá py om-
boyru pyre re rami,

- rejao'ipa 'rã atekoavyague.
- 18 Ha'e rami avi yvyty iku'ipa ha'e ivaipa 'rã ový,
itaova voi ho'a 'rã oñague gui,
- 19 yy omomba 'rã ita,
ha'e tyguaxu vy ogueroxyry 'rã heravy yvy
ku'i.
- Ha'e rami ae avi ndee rembovaipa 'rã
mba'emo avakue oarõ va'e.
- 20 Ha'e kuery re ndepo'aka riae ramo
ha'e kuery opa 'rã oje'oivy.
- Ha'e kuery pe nderova amboae rami rexu uka
reve
remondouka 'rã mombyry.
- 21 Ta'y kuery omboetea teĩ tuu kuery ndoikuuai
'rã.
Ha'e rami e'ŷ vy omo'yvyi'ia teĩ ae ma tuu
kuery ndoikuuai 'rã.
- 22 Ha'e kuery ma guete re anho 'rã oendu haxy
va'e,
ha'e guekovea re ae 'rã ojexavai — he'i.

15

Jó reko vaia re Elifaz ijayvuague

- 1 Ha'e ramo Temã pygua Elifaz ombovai:
2 — Hi'arandu va'e nda'u ombovai 'rã yvytu rami
rive?
Onhemonyẽ 'rã ri ty'y kuaray oua katy gui
yvytu ou va'e py?
- 3 Ayvu mba'everã ovare'ŷ va'e py nda'u ijayvu 'rã,
ayvu nhomoingo porã va'erã py 'rãgue py?
- 4 Mba'eta ndee ma Nhanderuete renonde
ojererokyje va'e pe “Ovare va'e'ŷ” 're,
ha'e rejapoxe nomboeteavei aguã ramí.
- 5 Mba'eta ndereko vaia rupi ae ndeayvu,

ha'e nhombotavy va'e kuery ayvu anho rejou
porāve.

⁶ Ndejuru guigua ae 'rā nembopaga, xee e'ŷ.
Nerembe ae ijayvu nderovai.

⁷ — Ndee teve ava jypy'i itui va'ekue reiko?
Yvyty ikuai e'ŷ mbove ma voi teve reiko
raka'e?

⁸ Ndee teve rendu raka'e Nhanderuete opy'a re
mba'emo omoī rā?
Ndere anho'i teve oī 'arandua?

⁹ Mba'e nunga tu ndee reikuua, ore kuery roikuua
avi va'e'ŷ?
Mba'e nunga 'arandu tu ndere oī, ore kuery re
oī va'e'ŷ?

¹⁰ Mba'eta oreregua ikuai avi tujakue'i hi'a xiīmba
va'e,
nderu gui voi tujakue'ive va'e.

¹¹ Ndee teve nerembovareive ta Nhanderuete
nembopy'a guaxu ukaa,
ha'e ayvu porā'i rupi ndevy oreayvua?

¹² Mba'e re tu rejereraa uka nekuraxō py oī va'e
rupi rive?
Mba'e re tu rema'ẽ vaikue rei ri,

¹³ Nhanderuete rovai ndevaia rupi,
ha'e rami ete ndeayvu aguã?

¹⁴ Marā ramigua tu avakue, iky'a e'ŷ va'e ikuai
aguã?
Marā ramigua tu kunha gui itui'i va'ekue,
heko porā va'e oiko aguã?

¹⁵ Ma'ẽ, Nhanderuete ma ndojeroviai neī ojeu-
pegua iky'a e'ŷ va'e kuery re.
Ha'e oexa rā neī yva re voi iky'a e'ŷ va'e noī.

16 Avakue katuve ma ojou vaipy ha'e ojeguarupy
meme ikuai,
yy oy'u va'e rami mba'emo vai ojee omoī va'e!

Heko vai va'e kuery opagaa aguā re Elifaz ijayvuague

17 — Ejapyxaka ke xeayvua re, ha'e rā rombo'e 'rā.
Mba'emo aexa va'ekue amombe'u 'rā ndevy,
18 hi'arandu va'e kuery omombe'u va'ekue ae,
nguu kuery gui oendu vy ndoikuaa uka e'ŷi
va'ekue.

19 (Ha'e va'e kuery pe ae yvy ome'ēa raka'e,
peteīve henda rupi amboae regua kuery
nda'ikuai.)

20 Ha'e rā heko vai va'e kuery ma ko'ē nhavō 'rā
ojexavai,
ikuiaia ma'etŷ ijapu'a'i 'rā, nhomoingo axya
kuery pegua ae.

21 Ha'e kuery apyxa py onhendu 'rā imongygearā.
Mba'emo oguerekopa rei teī ha'e kuery re ou
'rā imbovaipaaraā.

22 Ha'e kuery ndogueroviai pytū vaikuea gui ojevy
ju aguā,

ha'e rami 'rāgue py oarō kyxe imombaaraā rive.

23 Ho'u va'erā oeka oje'oivy vy "Mamo tu oī?" he'i
'rā okuapy.

Oikuuaa porā avi pytū aguā ára hexe ou ta maa.

24 Jexavaia ha'e moingo axya ma omongyjepa rei
'rā.

Ha'e kuery re ha'e nunga ipo'aka 'rāe, huvix-
ave joe opu'ā aguā oiko katu porā va'ekue
rami,

25 Nhanderuete rovai opo oupi rire,
Ipo'akapa va'e ombojaru rei vy.

- 26 Ha'e rami vy hexe opu'ã okuapy onhea'ã rei
reve,
hu'y jokoa inhana va'e re rive ojerovia va'e
rami.
- 27 Hova re ikyra anho oĩ,
ijyke kyrapa avi
- 28 teĩ tetã ivaipa va'ekue py hekoia,
oo oĩ aguã nda'eveia py,
ombovaipa pyrã py rive ikuai.
- 29 Ha'e nunga rupi ha'e kuery ndojou retai 'rã
mba'emo,
mba'emo ojapo va'e noĩ arei 'rã guive,
imba'e rei-rei voi ndaetai 'rã yvy re.
- 30 Ha'e kuery ndoo jepei 'rã pytũ vaikue gui.
Tata rendy vuku-vuku overepa 'rã hoky.
Ha'e gui Nhanderuete ojuru gui oipejua rive
'rã ogueraa.
- 31 Ha'e nunga rupi ovare e'ŷ va'e re ejerovia eme,
ndee ae rejekore vy,
mba'eta ovare e'ŷ va'e rive 'rã oĩ ndevy guarã.
- 32 Ha'e nunga omomba 'rã hi'ára ovaẽ e'ŷ mbove,
ha'e ramo hakã nda'ipyauvei ma 'rã.
- 33 Ha'e kuery ikuai 'rã uva aky'i oitypa pyre rami,
ha'e oliveira ipoty ho'apa va'ekue rami rive.
- 34 Mba'eta heko vai va'e kuery heta ikuai teĩ
ndata'yi 'rã,
ha'e tata oapypa 'rã nhomba'e rei-rei pe'aare
kuery ro.
- 35 Ha'e kuery ma mba'emo vai anho oguereko'i
rire oikuavã'i 'rã teko vai,
nhombotavy aguã rive opy'a re omoĩ rire —
he'i.

16

Nhanderuete openaa re Jó ijayvuague

- ¹ Ha'e ramo Jó ombovai:
- ² — Aendu riae ma ha'e ramigua.
Peē ha'e javive ma xembopy'a porā 'rāgue py xemoangeko rei.
- ³ Ndopai 'rā teve yvytu rami pendeayvua?
Mba'e tu pendu ra'e ha'e rami ete xembovai aguā?
- ⁴ Xee voi xeayvu kuaa peē pendeayvua rami.
Xee aiko axya rami peē peiko axy va'e rire xee voi xeayvu reta kuaa 'rāgue peē kuery pe, penderovai xekā ambovava reve.
- ⁵ Xee romombaraete kuaa avi 'rāgue xeayvua py, xejuru py romboaxya aexa uka va'e py aipe'a aguā haxy pendu va'e!
- ⁶ — Xeayvu ainy teī haxy aendu va'e ndoaxai 'rā.
Ha'e rami e'ŷ vy akyrirī teī mba'e nunga py 'rā tu anhenhandu porā?
- ⁷ Anhetē opa ma xembaraetea areko va'ekue.
Ndee Xeruete remomba ma xero pygua kuery ha'e javi.
- ⁸ Ha'e nunga aexa uka xexorīmbaa py,
xeangaia voi xerovai opu'ā vy xembojexavai riae.
- ⁹ Ndepoxya py xemboa'ypa, xere nandea'ei vy.
Xerovai neraī jekyty ha'e rema'ē ratā xerovaigua rami.
- ¹⁰ Avakue voi xerovai oipe'a okuapy ojuru.
Ha'e rami vy xere ija'e e'ŷa rupi xepetepa,
xerovai ha'e javive ijaty okuapy.
- ¹¹ Ojerovia e'ŷ va'e po py Nhanderuete xemboaxa,

heko vai va'e kuery po py ha'a aguã rami
xeapo.

¹² Xee aiko porã rei va'ekue ri ha'e xemopẽmba.

Xeaju'y re ojopy vy xemboa'ypa.

Xemoõ guembiporu hu'y oa'anga aguã.

¹³ Xejoko ngu'y py,

oipyxo xepyky raxí re xemboaxy e'ÿ re,
ha'e ramo xepy'a upia onheë yvy re.

¹⁴ Xemboguaiague rupi ae ju xemboguai,

ha'e vy xere ou joe opu'ã va'e ramigua.

¹⁵ Xejee amoõ ae ajukue voxá guigua,

ha'e yvy ku'i py aity anhemboyvate reia rupi
aikoague.

¹⁶ Ajae'o rã xerova ma pytãmba rei,

ha'e xerexa pepi ma manoá guigua omo'ãmba,

¹⁷ xepo re ajojukaague noõ,

ha'e xeky'a e'ÿa rupi anhembo'e teĩ.

¹⁸ — Ndee yvy, ejao'i eme xeruguy,

toõ eme guive ajapukaia onhendu e'ÿa!

¹⁹ Ma'ë, aÿ ma voi xerekó mombe'u porãvearã oĩ
yva re,

yvate ma oĩ xere ojerure va'erã.

²⁰ Xeirû kuery xejojai rei okuapy ramo

Nhanderuete renonde xerexay reve tema aĩ,

²¹ arõ vy Nhanderuete pe ha'e va'e ojerure aguã
avakue re,

oirû pe avakue ra'y kuery joe ojerurea rami
avi.

²² Mba'eta ma'etÿa oĩ reta ve'ÿa py

aa 'rã peteĩ tape rupi ndajevyvei aguã.

- ¹ — Xenhe'ẽ opa ov y ma,
 xe'ára voi opa avi ov y,
 ha'e xerenonde oĩ va'e ma xenhon o porãa
 aguã anho.
- ² Anhetẽ porojojai rei va'e kuery xembojere rei
 okuapy,
 xerexa py xemoange ko reia kuery anho rei
 aexa.
- ³ Ha'e gui eme'ẽ xev y mba'emo aiku aa aguã ndee
 xemboeko porã 'rãa.
 Enhemoõ ndee ae ha'e nunga kuaa ukaarã.
 Mba'eta ndee e'ŷ vy mava'e 'rã tu ikuaa
 ukaarã oĩ?
- ⁴ Mba'e ha'e kuery kuraxõ remboty ma hi'arandua
 oĩ e'ŷ aguã.
 Ha'e rami vy neremboyvatevei ma.
- ⁵ Amongue oirũ kuery imombaarã pe omboaxa
 ramo
 ta'y kuery voi ndaexa pyxovei 'rã.
- ⁶ — Ha'e rã xee ma xemoõa heta va'e kuery xejojai
 rei okuapy aguã.
 Xemoingoa xerova re onyvõmbaa rei aguã.
- ⁷ Ha'e nunga rupi ae ndaxerexa pyxovei ma xepo-
 riau rã,
 ha'e xerete regua ha'e javi kuaray'ã rami ndo-
 jekuaa porãvei.
- ⁸ Heko porã va'e kuery xerexa vy onhemondyipa
 rei okuapy.
 Ha'e rami vy ojejav y e'ŷ va'e kuery opu'ã 'rã
 heko vai va'e rovai.
- ⁹ Ha'e rami teĩ heko porã va'e kuery oo tema 'rã
 guape rupi ae,
 ipo ky'a e'ŷ va'e kuery imbaraeteve 'rã
 oje'oivy.

- ¹⁰ Ha'e gui peẽ kuery ha'e javi pejevy, peju ju kyvõ katy.
 Ha'e rami avi peẽ kuery regua peteĩve ma ndajoui 'rã hi'arandu va'e.
- ¹¹ Xe'ára oaxa ma ový, anhembopy'aague voi oaxa rivepa ma, xepy'a re aipotaa amoĩ va'ekue ha'e javi.
- ¹² Xevy pe pytû peikuaa uka ára oĩ rami rive.
 Ha'e vy aipo peje: "Pytû teri teĩ hendy va'e ovaẽ rai'i ma", peje rive.
- ¹³ Ha'e rã xee ma xenhono porãa aguã py arõ xerorã,
 pytûa py ae xeruparã itui.
- ¹⁴ Xenhono porãarã pe ajapukai vy "Ndee ma xeru", ha'e.
 Taxo ikuai va'e pe voi "Peẽ ma ha'i ha'e xereindy kuery", ha'e.
- ¹⁵ Ha'e gui mba'e tu oĩ arõ aikovy aguã?
 Tá, xee arõ va'e mava'e 'rã tu oikuaa?
- ¹⁶ Ha'e nunga oguejy 'rã manoa rokẽ peve xereve yvy ku'i py apytu'u ma jave — he'i.

18

Heko vai va'e kuery opa aguã re Bildade ijayvuague

- ¹ Ha'e ramo Sua pygua Bildade ju ombovai:
² — Raka'e peve 'rã tu ndeayvu aguã re renhea'ã?
 Eikuua pota porã ranhe, ha'e gui ma ja-jogueroayvu 'rã.
- ³ Mba'e re tu mymba rami ri ndee orekuua,
 ha'e hi'arandu e'ŷ va'e roikoa rami reikuua?
- ⁴ Ai! Ndee ndepoxya py ae renhemboa'ypa va'e, ndere vy ri nda'u roejapa ta yvy?

- 5 — Ha'e itaova ikuai va'e nda'u ova 'rā oīague gui?
Anhetē, heko vai va'e kuery rataendy ogue 'rā,
neī hata raviju ma voi ndojekuaavei 'rā.

6 Ha'e kuery ro rupi hendy va'e oī va'ekue pytūmba
'rā,
yvate tataendy oupi imoiny va'ekue ogue 'rā.

7 Oguata porā oje'oivyague gui ipyxxyry 'rā ovv,
ha'e gui onhembopy'aague py ae oitya 'rā.

8 Mba'eta ha'e kuery py ae ombo'a 'rā,
nħuā juru áry rupi ae oo rire.

9 Mba'emo mbo'aa ojopy 'rā ipyta rupi,
ha'e nħuā ojopy 'rā.

10 Ha'e kuery ndoexai 'rā ixā yvy rupi itui va'e,
neī imbo'aarā tape py oī va'e.

11 Jova-jovai katy gui imongyjeareā ou vy omondyi
'rā,
omonha 'rā heravy oikoa nhavō rupi.

12 Ha'e kuery áry ou 'rā imoingo axyarā omomba
aguā,
ha'e iporiau aguā oarō 'rā ijyvýry.

13 Ha'e nunga ombovaipa 'rā hete regua ha'e javi.
Manoa regua jypygua omomba 'rā.

14 Heko vai va'e kuery oipe'aa 'rā ngoo py ojerovia
oinyague gui,
ha'e vy ogueraa 'rā imongyjea tuvixave va'ea
py.

15 Hoo pygua kuery peteīve ma noīvei 'rā hogue py,
ha'e oīague rupi omoaīa 'rā enxofre.

16 Iguy rupi hapo ipirupa 'rā,
ha'e rā hakā ma hi'áry rupi 'rā ipirupa.

17 Ha'e kuery re na'ima'endu'aavei 'rā yvy re,
ha'e tetā mbyte gui nonhenduvei 'rā hery.

18 Hendya gui ha'e kuery omomboa 'rā pytūba py,

- oipe'apaa 'rā yvy gui.
- 19 Ndata'yi neī namyminoi 'rā guetarā kuery
mbyte,
ha'e hoo pygua kuery peteīve ma ndoikovevei
'rā hogue py.
- 20 Okanhyague ára gui kuaray oikea katyguia kuery
onhemondyipa 'rā,
ko'ea katyguia kuery voi okyjepa 'rā okuapy.
- 21 Anhetē ha'e rami ae heko vai va'e kuery reko,
ha'e rami ae opa 'rā Nhanderuete oikuaa e'ý
va'e kuery — he'i.

19

Jó ojexavai teī hepyarā oikoa rami ijayvuague

- ¹ Ha'e ramo Jó ombovai:
- 2 — Raka'e peve 'rā tu pemoingo axy xenhe'ẽ,
ha'e ayvu py xemou'ũmba rive?
- 3 Dez-kue ma pendeayvu rei xere,
xembojexavai aguã napexí vy.
- 4 Xapy'a rei anhetē xee ajejavy va'e rire
xere anho 'rāgue oĩ ajejavyague re apaga aguã.
- 5 Xapy'a rei xerovai penhemboyvatexe,
ha'e xemo'yvỹiague re pendeayvu reixe vy,
- 6 peikuaa porā pota aŷ povae re:
Nhanderuete ae xemoingo axy va'ekue okya
py xejoko vy.*
- 7 Ajapukai: “Xemomba ta!” ha'e teī noenduai.
“Xepytyvõ kel!” ha'e teī ndoikoi xemboeko
porāarā.
- 8 Xerape ha'e ojoko rā nda'evei aave aguã.

* **19:6** Jó ma “Nhanderuete xemoingo axy” he'i va'eri oayvu ha'e
oguerovy'a (2.3-6).

- Xee aa aguā rupi ha'e omoī pytūa.
- ⁹ Omboetepy aikoague gui xepe'a vy
 xeakā gui omboi xembojeguaarā oī va'ekue.
- ¹⁰ Jova-jovaive gui xereity rire aa ma ainy.
 Xegui oipe'a arō va'ekue yvyra hi'añague gui
 oapo'o va'e rami.
- ¹¹ Xerovai hendy ipoxya,
 ngovaigua rami xererekō ramo.
- ¹² Ixonدارو kuery ou okuapy xere.
 Xerupity aguā ha'e kuery oguerekō katu
 guaperā,
 ha'e vy xero yvýry rupi xejoko okuapy.
- ¹³ Xegui ha'e oipe'a xeryvy kuery mombyry.
 Xekuaa va'e kuery voi ojepe'apa xegui, xerexa
 va'ety e'ŷ rami rive.
- ¹⁴ Xeretarā kuery xerejapa oje'oivy,
 ha'e xekuaa va'e kuery hexaraipa ma xegui.
- ¹⁵ Xero py amovaē va'ekue ha'e xerembiguai
 kuery ma amboae yvy regua rami xekuaa,
 ha'e kuery pe rā yvy mboae regua aiko.
- ¹⁶ Amongakuaa va'ekue ma aenoī teī naxembo-
 vaivei,
 mba'emo re xee ae ajerure porā'i teī.
- ¹⁷ Xera'yxy ma noetūxevei ma xepytuēa,
 ha'e xeryvy kuery pe ojeguarupy aiko
 xereakuā vaikue va'e vy.
- ¹⁸ Kyrīgue voi naxemovaēxevei,
 xee apu'āxe rā xejojai rei okuapy.
- ¹⁹ Xerayvu ete va'ekue xembojeguarupa okuapy,
 ha'e xee ayvu va'ekue voi xerovaigua on-
 hemoingo.
- ²⁰ Xepire ojapa ma xekāgue ha'e xero'o re,

- ha'e haxy'i py aa jepe nho.
- ²¹ Xemboaxy ke, xerembiaayvu kuery.
Xemboaxy, mba'eta Nhanderuete po xerupity.
- ²² Mba'e re tu xemonha rei pekuapy Nhanderuete
xemonhaa rami?
Mba'e re tu ndapepytu'ui ri xero'o pemombaa
gui?
- ²³ Xeayvua omboparaa va'e rire!
Kuaxia re ipara oiny va'e rire!
- ²⁴ Ferro rakua ha'e chumbo reve
ita re ipara va'e rire raka'e rã peve guarã!
- ²⁵ — Mba'eta xee aikuua xerepyarã oikoa,
ha'e opaa py opu'ã 'rã kova'e yvy re.
- ²⁶ Ha'e va'e rire kova'e xepire ivipa ma teĩ
xero'o reve ae 'rã aexa Nhanderuete.
- ²⁷ Aexa 'rã xee ae, xerexa py ae aexa 'rã, amboae
nda'ei.
Aexaxe ete rã
xekuraxõ na'imbaraetevei ma xeryepy py.
- ²⁸ Xapy'a rei aipopeje 'rã: "Marã rami 'rã tu ro-
moingo axy?
Ndekáuxa ae upe va'e mba'emo vai oiko", peje
teĩ
- ²⁹ pejererokyje ikyxe gui,
mba'eta xere pendeayvua re ou 'rã ipoxya,
pendere oikuua pota va'erã oikoa peikuaa
aguã — he'i.

20

*Heko vai va'e kuery ojexavai aguã re Zofar
ijayvuague*

- ¹ Ha'e ramo Naamá pygua Zofar ju ombovai:
² — Aikuua va'e re xeayvuxe vy

- ajapura rombovai aguã.
- ³ Xee aendu ndeayvu etea xemoxõmba va'e,
xenhe'ẽ py aendu aikuaa va'e rupi rombo-
vaixea.
- ⁴ Ndee ndereikuuaai teve ha'e javi oiko ypy guive,
yvy re avakue omoingo ypya guive
- ⁵ heko vai va'e kuery xapy'a'i rive ovy'a okuapya,
ojerovia e'ŷ va'e kuery ovy'a xapy'a'i 'rãa?
- ⁶ Ha'e kuery ojejou porãa yva re peve oo,
ha'e arai re peve oakã oupi teĩ ae ma
- ⁷ hu'ũmba 'rã raka'e rã peve guarã, hepoxi rami
rive.
Ha'e rã oexa va'ety kuery "Mamo tu ikuai?"
he'i 'rã okuapy.
- ⁸ Ha'e kuery ma oexa ra'u pyre rami okanhymba
'rã,
ha'e rã ndojouavei 'rã.
Omonhaa 'rã imondovy pyávy mba'emo oexa
pyre rami.
- ⁹ Hexaare kuery ndoexavei ma 'rã,
ikuaiague py ae teĩ ha'e kuery re
na'ima'endu'aavei ma 'rã.
- ¹⁰ Ta'y kuery ju onhea'ã 'rã iporiaukue'i oguerorya
rupi,
ha'e vy opo py ae ome'ẽmba ju 'rã imba'e rei-
rei oipe'aa va'ekue.
- ¹¹ Ikãgue kunumi jave rami imbaraete teĩ,
imbaraete reve 'rã itui yvy ku'i rupi.
- ¹²— Ha'e kuery pe rã ijuru py mba'emo vai he'ẽ 'rã,
ha'e vy oapekũ guy py oguerek.
- ¹³ He'ẽ ramo nomokõxei vy
oguerek ranhe 'rã ojuru py.

- 14 Ha'e rami teĩ hyepy py ma amboae rami 'rã ojeapo.
 Mboi guigua rami 'rã iro vaikue ojeapo hyepy py.
- 15 Mba'emo oguerekopa va'e omokõ va'ekueomboevypa ju 'rã.
 Nhanderuete ae 'rã ojapo guyepy guiombojевypa aguã rami.
- 16 Mboi guigua veneno oy'u rire
 inhapekũ ae ju ojuka 'rã.
- 17 Ha'e kuery ndoguerovy'ai 'rã yakã'i oexa vy,
 neĩ ei ha'e kamby yakã rami oxyry va'e.
- 18 Mba'eta omba'eapoague repy ojou va'ekue
 omokanhymba ju 'rã
 mba'eve ho'u e'ŷ re.
 Ojeupe guarã ojopy va'ekue regua peteïve
 henda py ndojoui 'rã ombovy'aarã,
- 19 ha'e kuery iporiaukue'i omoingo axy ha'e noipytyvõi rire,
 ha'e oo ojapo va'ekue'ŷ gui mba'emo oipe'apa
 rire.
- 20 — Oipotapa reia gui ndojep'eai rire
 nda'evei 'rã mba'emo oipota va'ekue ogueraajepé aguã.
- 21 Oipotapa reia gui ndopytu'ui rire
 imba'e rei-rei noĩ arei 'rã.
- 22 Ojoupa ete maa py ae 'rã ojexavai.
 Ha'e kuery re ou 'rã opa marãgua imombori
 auarã.
- 23 Ha'e kuery rye monyẽarã Nhanderuete ombou
 'rã opoxy etea.
 Tembi'u 'rãgue py ha'e nunga anho ombou 'rã
 oky rami ha'e kuery áry.

- ²⁴ Tembiporu ferro guigua gui ha'e kuery ojava teĩ guyrapa overa va'e guigua py 'rã onhyvõa.
- ²⁵ Ha'e ramo okupe gui hu'y oekyi rã overa rei 'rã huguy re.
Ha'e ramo oendu 'rã onhemondyia.
- ²⁶ Ha'e kuery peguarã omoña 'rã opa marã ojexavai aguã.
Tata omomba 'rã avave rei oipeju e'ŷ teĩ, hoo py opyta va'ekue-'ekue omomba peve.
- ²⁷ Yva gui oikuaa ukaa 'rã heko vaia.
Ha'e rã yvy gui ma opu'ã 'rã hovai guarã.
- ²⁸ Ngoo py oguerekopa va'ekue oipe'apaa 'rã Nhanderuete poxya ára py, yy onhoëa va'e rami.
- ²⁹ Ha'e ramigua ae 'rã avakue heko vai va'e ojopy Nhanderuete po gui.
Ha'e nunga anho ha'e kuery peguarã oĩ Nhan-deruete ijayvuague rami vy — he'i.

21

Heko vai va'e kuery ov'yaa re Jó ijayvuague

- ¹ Ha'e ramo Jó ombovai:
² — Pendu porã pota ke xeayvua.
 Ha'e ramia py peẽ xembopy'a porã 'rã.
- ³ Xereroangekove eme, ha'e rã xee ju xeayvu 'rã.
 Ha'e gui xeayvupa ma ramo mae ha'eve 'rã xejojaive aguã.
- ⁴ Avakue re rive teve xee xeayvu ndavy'aia rupi?
 Mba'e re'ŷ teve arõ are aguã nda'evei?
- ⁵ Pema'ẽ xere, ha'e vy pekyrirĩ 'rã.
 Ha'e rami vy pejoko 'rã pendejuru pendepo py.

- 6 Mba'eta ha'e nunga re xema'endu'a vy rive ndax-
erekorāvei,
ha'e xero'o ha'e javi re aendu xepirīmbaa.
- 7 — Ha'e gui mba'exa tu heko vai va'e kuery
okuave are?
Mba'eta ha'e kuery tuja'i teĩ ipo'akapave tema
'rã.
- 8 Henonde ma ta'y kuery ikuai porã 'rã.
Guamymino kuery voi oexa avi 'rã.
- 9 Ha'e kuery ro rupi oĩ mby'a porã,
ha'e Nhanderuete nombopagai 'rã yvyra po'i
py.
- 10 Hymba toro ma ta'y'i 'rã ma'etŷ nhavõ,
hymba vaka ta'y vy ndoityi 'rã.
- 11 Hoo pygua kyrīgue'i ma onha-onha 'rã okuapy
vexa'i rami,
ta'y kue'iry voi opo-opo 'rã ov'y'a vy.
- 12 Oporaei 'rã okuapy pandeiro ha'e ixã reta va'e
reve,
mimby pu guive oendu vy oguerovy'a vaipa
'rã.
- 13 Ára nhavõ ha'e kuery oaxa 'rã oguerekopaa py,
mby'a porã reve oguejy peve yvyra rupa py.
- 14 Ha'e kuery ae 'rã aipoe'i Nhanderuete pe:
“Ejepe'a ke oregui!
Ndoroikuaaxeit ndeguigua tape.
- 15 Mba'eta mava'e tu Ipo'akapa va'e, ixupe jaiko
aguã?
Mba'e tu jajopy 'rã ixupe nhanhembo'eague
re?” he'i 'rã okuapy.
- 16 Ha'e rami teĩ ma'ẽ, ha'e kuery oguerekopa aguã
ma ipo gui ae e'ŷ ou.
Xevy pe nda'evei ae heko vai va'e kuery on-
hemongetaa rami aiko aguã!

- 17 — Mbovykue tu heko vai va'e kuery rataendy
omboguea?
- Mbovykue tu ha'e kuery áry omboua 'rã
imombaarã?
- Mbovykue tu Nhanderuete opoxya rupi om-
bou 'rã ha'e kuery ikuai axy aguã?
- 18 Mbovykue tu ha'e kuery omoxëa 'rã jai pirekue
yvytu ogueroveve heravy va'e rami,
e'ŷ vy mba'emo pirekue yvytu jere ogueraa
va'e rami?
- 19 Ha'e rã peẽ kuery aipopeje: “Nhanderuete ma
oarõ 'rã heko vai va'e ra'y kuery ombopaga
aguã”, peje 'rã.
- Ha'e rami teĩ ha'e kuery ae Nhanderuete om-
bopaga va'e rire, ha'e kuery ae oendu aguã
haxyá.
- 20 Ha'e kuery ae toexa imombaarã ou rã,
ha'e kuery ae toy'u Ipo'akapa va'e poxya gui.
- 21 Mba'eta ha'e kuery omano ma rire, hekove
oipe'aa ma ramo,
mba'exa tu ha'e kuery oendu 'rã ngoo pyguare
kuery reko gui?
- 22 Amongue nda'u omo'arandu kuaa 'rã Nhan-
deruete?
Mba'eta ha'e ma yva re ikuai va'e re voi oikuaa
pota va'e.
- 23 Amongue ma imbaraete reve 'rã omano,
heko eta rei e'ŷ, mba'eve rei oendu e'ŷ re
guive,
- 24 imba'e yryru kamby tynyẽ reve,
ha'e ikâgue ratã e'ŷa hexaĩmba rei reve.
- 25 Ha'e rã amboae kuery ma ikuerai rei reve 'rã
omano,

- mba'emo porã ndojoui rire.
- ²⁶ Ha'e rami teĩ mokoĩve regua joapy 'rã ikuai yvy
ku'i py,
taxo ojao'ipa aguã py.
- ²⁷ — Ma'ẽ, xee aikuaa ae ma pejapoxea,
mba'eta ha'eve'ÿa rami penhembopy'a xem-
bojexavaive aguã re.
- ²⁸ Mba'eta aipopeje: “Mamo tu opyta yvateve va'e
teko vai rupi oiko va'e rogue?” peje 'rã.
- ²⁹ Ha'e rami teĩ peporandu na oguataa rupi ikuai
va'e pe.
Napendu potai teve mba'emo ha'e kuery
omombe'u rã?
- ³⁰ Mba'eta aipoe'i 'rã: “Jexavaia ára py heko vai
va'e kuery omboaxya 'rã,
ogueraa jepea 'rã poxya ára gui”, he'i 'rã.
- ³¹ Mava'e tu omboayvu 'rã ha'e kuery ikuia re?
Mava'e tu ombopaga 'rã ojapo vaiague re?
- ³² Mba'eta opaa py ha'e kuery retekue ogueraa 'rã
onhono porãa aguã katy,
ha'e onhono porãague re openaa 'rã.
- ³³ Ha'e kuery rupa áry yvy itui va'e nda'ipoyi 'rã,
ha'e avakue ha'e javi oje'oi 'rã hetekue
rakykue,
henonde oje'oi va'e voi mbovy rei e'ÿa rami
avi.
- ³⁴ Ha'e nunga rupi mba'e re tu xembopy'a porãa
rupi merami teĩ pendeayvu rive?
Pembovaia ha'e javi re ma apu anho oĩ — he'i.

22

Jó ojejavy etea rami Elifaz ijayvuague

¹ Ha'e ramo Temã pygua Elifaz ju ombovai:

- 2 — Ha'e gui avakue nda'u mba'emo ovare 'rã ri
Nhanderuete pe?
Any, oikuaapa va'e teĩ ojeupe ae ovare va'e.
- 3 Tyrã pa ndereko porãa teve ombovy'a 'rã
Ipo'akapa va'e?
Xapy'a rei ndee rejekavy e'ŷ re reiko rã ha'e
ojou porã 'rã teve?
- 4 Nhanderuete renonde rejererokyjea re teve
nembopaga,
nderovai oikuua potaa py?
- 5 Nderekvaia ndatuvixai teve?
Rejekavya ma opa va'erã e'ŷ teve?
- 6 Mba'eta mba'e re'ŷ reipe'a mba'emo nderyvy gui,
ha'e iporiaukue'i gui voi reipe'a iiao.
- 7 Ikane'õ va'e pe ma yy nereme'ẽi oy'u aguã,
okaruxe va'e pe voi nerakâte'ŷ tembi'u re.
- 8 Ipo'akakueve pe rive yvy itui,
avakue yvatekueve anho 'rã ikuai ha'e py.
- 9 Ha'e rã imeve'ŷ va'e kuery ma ipo rei reve rem-
bojevy,
ha'e tyre'ŷ kuery mbaraetea remomba.
- 10 Ha'e nunga rupi ae nhuã ndejokopa,
ha'e rekyjea rendu xapy'a vy renhemondyipa
rei,
- 11 pytúa guive, mba'eve rex a e'ŷ teĩ.
Ha'e ramo ae yy tyguaxu va'e ndeao'i 'rã.
- 12 — Yva re yvatevea py e'ŷ teve Nhanderuete oĩ?
Ema'ẽ ha'vy jaxy-tata yva re ikuai va'e re.
Ha'e va'e ma nda'yvate ma ra'agai!
- 13 Ha'e rami teĩ aipo're: "Mba'e tu Nhanderuete
oikuua?
Ha'e nda'u oikuua pota 'rã mba'emo re,
oexa 'rã teve pytú ana rupi?"

- ¹⁴ Mba'eta yva apy rupi ha'e oguata oikovya rupi
arai ana ojao'i 'rā
mba'emo oexa aguā rami e'ŷ", 're.
- ¹⁵ Ha'e gui ndee nda'u reikoxe teri tape ymague
rupi,
heko vai va'e kuery ikuaiaty rupi?
- ¹⁶ Ha'e va'e kuery ma oipe'apaa vyvoi raka'e hi'ára
ovaē e'ŷ mbove.
Ha'e kuery ytarā oĩ va'ekue ma yxyry atā va'e
ogueraapa.
- ¹⁷ Mba'eta Nhanderuete pe aipoe'i: “Ejepe'a ke
orea gui!
Mba'e tu Ipo'akapa va'e ojapo 'rā orere?” he'i
rire.
- ¹⁸ Ha'e rami teĩ ha'e kuery ro ha'e omonyẽ
mba'emo porā anho.
Ha'e rā xevy pe nda'evei ae heko vai va'e
kuery onhemongoetaa rami aiko aguā.
- ¹⁹ Ha'e kuery opa rā heko porā va'e kuery oexa vy
ovy'a 'rā.
Ha'e kuery re ojejavy e'ŷ va'e opuka 'rā.
- ²⁰ Ha'e vy aipoe'i 'rā: “Anhetẽ, nhanderovaigua
kuery omombaa ra'e,
ha'e rā mba'emo oeja va'ekue ma tata ju
omomba”, he'i 'rā okuapy.
- ²¹ — Ha'e nunga rupi peteĩ rami ju pota ke eiko
Nhanderuete reve,
revy'a nho aguā.
Ha'e ramo ndere ou 'rā iporā va'e.
- ²² Ajerure ndevy, ejapyxaka porā pota ke nembo'e
rā,
ha'e ndepy'a re emoĩ ijayvua.

- 23 Mba'eta Ipo'akapa va'e pe rejeko rerova uka
ramo reiko porã ju 'rã.
Xapy'a rei ndero gui mba'emo vai reipe'a
ramo,
- 24 ha'e ouro rerekva'e yvy ku'i py remombo
ramo,
ouro Ofir guigua rerekva'e yakã'i rupi ita
ikuai va'e mbyte rupi remombo ri ramo,
- 25 ha'e ramo Ipo'akapa va'e ae 'rã ndevyguia oiko
ouro ha'e prata oiporavo pyre rami.
- 26 Mba'eta rerovy'a 'rã Ipo'akapa va'e anho,
ha'e nderova rembovy 'rã Nhanderuete-a
katy.
- 27 Ixupe rejapukai ramo oendu 'rã,
ha'e ixupe ju rejapo 'rã renhemboayvuague.
- 28 Mba'emo rejapo aguã re renhembovy'a ramo
oiko porã 'rã,
ha'e tape reikoa rupi omoexakãmba 'rã.
- 29 Nhomo'yvyñ'ia rã rexava vy "Emopu'ã ju ke" 're
ramo
Nhanderuete ogueraa jepe 'rã onhemo'yvyñ'i
va'ekue,
- 30 oepy 'rã ojejavvy va'ekue teñ.
Ndepo iky'a e'ÿa re oma'ẽ vy 'rã ogueraa jepe
— he'i.

23

*Nhanderuete renonde Jó ojexa ukaxeare re
ijayvuague*

- ¹ Ha'e ramo Jó ombovai:
² — Aÿ voi ju xeayvu ta opu'ã rei va'e rami,
xepo py xepoaëa ajoko teñ.
³ Ai! Xee aikuaa va'e rire Nhanderuete ajou aguã!

- Ha'e rami vy ajexá uka 'rāgue oikuaa pota
oinya py.
- ⁴ Henonde anhemombe'u porā 'rāgue,
xejuru amonyē 'rāgue aikoa re xeayvu aguā.
- ⁵ Ha'e rami vy xembovai rā aikuaa 'rāgue,
aendu kuaa 'rāgue xevy ijayvu rā.
- ⁶ Opo'aka etea rupi nda'u ijayvu ete 'rāgue xevy?
Any, oikuaa pota porā'i 'rāgue xere.
- ⁷ Ha'e py ma heko porā va'e ijayvu 'rāgue hexeve,
ha'e raka'e rā peve xee aa jepe 'rāgue xem-
boayvu aguā gui.
- ⁸ — Ha'e rami teī ma'ẽ, xerenonde katy xee aa rā
noī 'rā ha'e py.
Xerakykue katy ajevy teī ha'e py voi ndajoui.
- ⁹ Xeaxua katy mba'emo ojapo teī xee ndaexa
reguai.
Xeaxua katy voi onhemi rā xee ndaexai 'rāe.
- ¹⁰ Ha'e rā ha'e ma oikuaapa xee aikoa.
Xera'anga va'e rire ouro iky'a e'ŷ va'e rami
ajekuaa 'rāgue.
- ¹¹ Mba'eta xepy ma ha'e oikoa rupi anho oiko.
Aī atā ixuguigua tape rupi aikoa rupi, nda-
jepe'ai ae.
- ¹² Ojuru py ojapo uka va'e gui xee ndajope'ai,
xepy'apy py amoī porā ijayvuague.
- ¹³ Ha'e rā ha'e ma mba'emo ojapo aguā re onhem-
bopy'a ramo
mava'e 'rā tu ojoko?
Mba'eta ha'e ojapoxe vy ojapo 'rāe.
- ¹⁴ Ha'e rami vy ojapopa avi 'rā xerekorā re
ijayvuague.

Ha'e va'e ramigua ma mbovy rei e'ŷ ojee omoĩ
ojapo va'erã.

¹⁵ Ha'e nunga rupi xepy'a eta rei 'rã henonde.

Ha'e nunga re aikuaa pota vy akyje.

¹⁶ Nhanderuete ojapo xepy'a re xekangya aendu
aguã rami,

Ipo'akapa va'e ae xembopy'a eta rei.

¹⁷ Mba'eta pytû vaikue gui e'ŷ xekangya aendu,
pytû reia xerova ojao'i va'e gui e'ŷ guive.

24

Mbovykue rei e'ŷ heko vai va'e kuery nombopa-gaia rami Jó ijayvuague

¹ — Mba'e re nda'u Ipo'akapa va'e noa'angai ri joe
oikuua pota aguã ára?

Mba'e re tu oikuua va'e kuery ndoikuuai ha'e
va'e ára?

² Mba'eta ikuai yvy markaa oguerova rive va'e,
ha'e mymba re imonda vy guymba kuery reve
ae omongaru va'e.

³ Ha'e kuery oipe'a 'rã tyre'ŷ rymba mburika,
imeve'ŷ va'e gui voi oipe'a 'rã hymba vaka.

⁴ Ojexavai va'e kuery pe ojavy uka 'rã tape.

Ha'e kuery gui iporiaukue'i yvy re ikuai va'e
onhemimba 'rã okuapy,

⁵ Ha'e va'e kuery ma omiba'epo aguã katy oje'oi 'rã
kavaju'i tekao e'ŷa rupigua rami,
iporiaukue'i voi yvy joja reia rupi oeka 'rã
oje'oivy ho'u va'erã.

Ha'e rami vy 'rãe ojou tembi'u ojeupe ha'e
gua'y kuery pe.

⁶ Heko vai va'e mba'ety py omono'õ 'rã mba'emo
aju,

- ha'e omondoro 'rã uva.
- ⁷ Ipire rei reve oaxa 'rã pytû ao oguerek e'ŷ vy.
Onheovã aguã ndoguerekoi vy yro'y oendu.
- ⁸ Vvyty rupi inhakŷmba 'rã oky gui.
Onhemi aguã oguerek e'ŷ vy itaova rupi rive
'rã onhemi okuapy.
- ⁹ Tyre'ŷ'i kuery omboia 'rã okambua gui,
ha'e iporiaukue'i gui oipe'a 'rã oguerek i
va'ekue.
- ¹⁰ Ha'e ramo ha'e va'e kuery ipire rei va'e ikuai ao
oguerek e'ŷ vy.
Karuai oendu vy ogueraa 'rã mba'emo aju
ojokua pyre.
- ¹¹ Heko vai va'e kuery roka py onhami 'rã azeite-
rã,
uva oumbiri avi teĩ oendu riae 'rã oy'uxea.
- ¹² Tetã rupi voi avakue ipoaẽ 'rã okuapy, ojeaipy
kuery ojapukai 'rã onhe'ẽ py.
Ha'e rami teĩ ha'e nunga re Nhanderuete
ndoikuua potai merami.
- ¹³— Ha'e rã heko vai va'e ma hendy va'e rovaigua
ikuai,
ndoikuuaai 'rã guive tape hendya katy oo va'e,
ha'e va'e rupi ndooxei guive.
- ¹⁴ Ko'ẽ rai jave jojuka rive-rive va'e opu'ã vy
ojuka 'rã iporiaukue'i ha'e ojexavai va'e.
Ha'e gui pyávy ma oo ju 'rã imonda aguã katy.
- ¹⁵ Itavy rei va'e voi oarõ 'rã pytû'i ta maa.
Ha'e vy aipoe'i ojeupe: "Avave rei ndaxerexa
kuaai 'rã", he'i vy omo'ã 'rã ov y ngovala.
- ¹⁶ Pytû jave avakue oike 'rã joo rupi,
ha'e gui ara py ma ngoo rupi ae 'rã ikuai.
Neĩ ndoexaxevei 'rã hendy va'e.

- 17 Mba'eta ha'e kuery ma ko'ëa pe "Manoa pytū guigua" he'i 'rā,
 ha'e rā pyávy nhomongyje reia ma ha'e kuery oexa va'ety ae oiko.
- 18 — Peẽ aipopeje: "Heko vai va'e kuery ma oguer-aapaa vyvoi 'rā yxyrya py.
 Yvy re ha'e kuery pegua oĩ va'e ma ayvu vaipy anho.
 Ndoovei 'rā tape uvaty katy oo va'e rupi ombo'eapo aguã.
- 19 Ipirua ha'e haku ma yro'y omboyku-a rami avi manoa voi omomba 'rā ojejavy va'e kuery.
- 20 Ha'e ramo ha'e kuery re ixy ae hexarai 'rā,
 ho'okue re taxo ov'y'a reve okaru 'rā okuapy.
 Heko vai kuery re na'ima'endu'aavei ma 'rā.
 Ha'e kuery omopẽmbaa 'rā yvyra rami,
- 21 imemby va'erã e'ŷ ha'e kuery omomba rire,
 ha'e imeve'ŷ va'e pe ndojapo porãi rire", peje.
- 22 — Any! Ha'e rami 'rāgue py Nhanderuete ombaraetea rupi ombopukuve 'rā ojerovia rei va'e kuery ára.
 Ha'e kuery ndaekorãvei teĩ opu'ã ju nho 'rā.
- 23 Ha'e kuery pe ha'e ome'ẽ 'rā opytu'u aguã.
 Ha'e ramo ikuai atã 'rā.
 Nhanderuete oma'ẽ 'rā ha'e kuery ikuaiia rupi.
- 24 Ha'e kuery ma xapy'a'i 'rā omboyvatea.
 Ha'e rire oaxa ju xapy'a 'rā, amboae kuery rami oipe'apaa 'rā,
 mba'emo ra'yigue rami avi ojaya 'rā.
- 25 Ha'e rami e'ŷ rā mava'e 'rā tu oikuaa uka xeapua,
 ha'e ombovaipa xeayvua? — he'i.

25

Nhanderuete renonde avave rei nonhemboeko porā kuaaia rami Bildade ijayvuague

- ¹ Ha'e ramo Sua pygua Bildade ombovai:
- ² — Ha'e rami avi Nhanderuete pegua anho oĩ
opena ha'e ipo'aka aguã.
Ha'e ma ojapo yva yvatevea rupi voi ikuai
porãa aguã rami.
- ³ Guembiguai xondaro kuery ma ndajaipapapa
kuaai 'rã.
Ixuguihua hexakãa ojope 'rã ha'e javi áry.
- ⁴ Ha'e rami rã mba'exa tu avakue onhemboeko
porã 'rã Nhanderuete renonde?
Mba'exa tu kunha gui itui'i va'ekue oiko 'rã
iky'a e'ŷ va'e?
- ⁵ Ma'ẽ, ha'e oexa rã jaxy eteve voi naendyi
ha'e jaxy-tata ikuai va'e iky'a e'ŷ va'e ndoikoi.
- ⁶ Ha'e gui avakue katuve ma taxo rami rive 'rã
yvȳigueve'i.
Avakue ra'y kuery ma taxo ramigua meme ae
ikuai — he'i.

26

Nhanderuete ipo'akapaa re Jó ijayvuague

- ¹ Ha'e ramo Jó ombovai:
- ² — Ikangy va'e pytyvõa merami rive reiko,
ijyva mbaraete e'ŷ va'e reipytyvõ merami
rive!
- ³ Hi'arandu e'ŷ va'e remongeta kuaa merami rive,
ha'e anhetẽ va'e reikuua uka porãmba merami
rive!
- ⁴ Mava'e nembo'ea rupi tu ndeayvu ha'e rami ete?

- Mava'e guigua nhe'ẽ tu ndere oĩ ndeayvu
kuaa aguã?
- ⁵— Ha'e gui omano va'ekue nhe'ẽ ma oryryipa 'rã
okuapy
yy guy py ikuaiia py.
- ⁶ Nhanderuete gui manoia pygua kuery nonhemi
kuaai,
yvykua vaikue ao'iarã noĩ ramo.
- ⁷ Mba'eve oĩ e'ŷa áry ha'e oipyo kuaray apu'a'ia
katygua,
mba'eve oĩ e'ŷa áry ae avi onhono yvy.
- ⁸ Arai ana ikuai va'e mbyte ojoko 'rã yy,
ha'e rami teĩ arai ndoxoi 'rã iguy py.
- ⁹ Ojao'i 'rã guenda opena oinyaty,
hi'áry arai pytãa py ojao'i vy.
- ¹⁰ Omoĩ raka'e yy apyrã,
hexakãa ha'e pytãa mbyte py.
- ¹¹ Ijayvu atã ramo yva yta
oryri 'rã onhemondyipa vy.
- ¹² Ombaraetaa rupi omboja'o raka'e ye'ẽ,
ha'e o'arandua rupi oity ngovaigua kuery.
- ¹³ Opejua py rive omoexakã 'rã yva,
ha'e opo py ojuka 'rã teju jagua inhakuã va'e.
- ¹⁴ Ma'ẽ, ha'e ramigua ma hembiapo ppy rive!
Mba'eta ixugui ma nhaendu mbeguei'i anho.
Ha'e gui mava'e tu oendu kuaa 'rã ipo'akaa
ryapu atã va'e?

27

*Heko vai va'e kuery ikuai axy aguã re Jó
ijayvuague*

¹ Jó ijayvuuve tema. Ha'e vy aipoe'i:

- 2 — Anhetē ete Nhanderuete Ipo'akapa va'e xevy
guarā va'ekue pe'aa
ha'e xenhe'ẽ moingo axya va'e rekove rupi
aura vy aipoa'e:
- 3 xee aikove teria ja,
ha'e xeapyīguá py xepytuẽ aguã Nhanderuete
ome'ẽ teria ja
- 4 xejuru nda'ijayvui 'rã ha'eve'ŷa rami,
xeapekũ nda'ijapui 'rã guive.
- 5 Nda'evei ete "Ha'evea rami pendeayvu", ha'e
aguã!
Amano peve ndajepe'ai 'rã anhetē rupi aikoa
gui.
- 6 Aĩ atã 'rã xereko porãa re, ndajepe'ai 'rãe.
Aikoa ára nhavõ xepy'apy py ndaikuaai aje-
javya.
- 7 — Xerovaigua kuery topa heko vai va'e rami,
xerovai opu'ã va'e kuery ma ha'eve'ŷa rami
ikuai va'e rami topa.
- 8 Mba'eta ojerovia e'ŷ va'e kuery ma mba'e tu oĩ
oarõ aguã,
hekove ojayaa,
ha'e inhe'ẽ Nhanderuete oipe'a rã guarã?
- 9 Ha'e kuery áry teko axy ou ramo
Nhanderuete oendu 'rã teve ojapukaia?
- 10 Heko vai va'e nda'u oguerovy'a 'rã Ipo'akapa
va'e?
Ixupe ojapukai 'rã teve oikoa ha'e javi py?
- 11 — Xee rombo'e 'rã Nhanderuete po'akaa re,
namombe'u e'ŷi 'rã Ipo'akapa va'e reve
mba'emo oĩ va'e.
- 12 Mba'eta peẽ kuery ha'e javi pexa ae ma ha'e
nunga.

- Mba'e re tu ha'vy ovare e'ŷ va'e anho pejou
porã?
- 13 Ma'ẽ, po ramigua anho heko vai va'e ojopy 'rã
Nhanderuete po gui,
Ipo'akapa va'e gui nhomoingo axya kuery
ojopy 'rã po rami.
- 14 Ha'e kuery ra'y kuery hetave oje'oivy teĩ kyxé
pyguarã meme ikuai,
hamymino kuery voi ndojou retai 'rã ho'u
va'erã.
- 15 Ha'e kuery va'e regua hembyre va'ekue ma
mba'eaxy omomba 'rã,
ha'e rã ta'yxykue ndojae'oi 'rã.
- 16 Heko vai va'e ma yvyku'i rami 'rã omboaty
prata,
oaorã guive yapo rami ojou-jouve 'rã.
- 17 Ha'e nunga omoĩ porã teĩ heko porã va'e kuery
ju 'rã onhemonde,
prata oguerekova'ekue voi ojejavy e'ŷ va'e
kuery ju omboja'o 'rã okuapy.
- 18 Heko vai va'e ngoorã ojapo va'e ma tanambi
raity rami,
ha'e oguy'irã mba'ety rarõa ojapo va'e rami
rive.
- 19 Iporiau e'ŷ va'e ma mba'emo oguerekopa va'e
mbyte py onheno teĩ
guexa oipe'a ju vy ndoexavei 'rã.
- 20 Ha'e kuery re imongyjearã ou vy ipo'aka 'rã yy
oxyry atã va'e rami,
pyávy ma yvytu vaikue ogueraapa 'rã.
- 21 Kuaray oua katy gui yvytu ou va'e ogueraaa ramo
okanhymba 'rã.
Oipe'apa 'rã heravy oñague gui.

- ²² Nhanderuete po gui ojava vyvoixe teī
hi'áry ha'e nunga ha'e javi ombou 'rã omboaxy
e'ý re.
- ²³ Heko vai va'e ho'a rã ojepopetepaa 'rã,
okanhy ovy ramo otuvy nhe'ẽ pavẽ 'rã imon-
dovy — he'i.

28

*Yvy guýry mba'emo porã oĩ va'e avakue oguenoẽ
kuua re Jó ijayvuague*

- ¹— Anhetẽ, prata re yvy jo'oa ikuai,
oĩ avi ouro ky'a'oaty.
- ² Ferro guive oguenoẽa 'rã yvy gui,
ha'e rã overa va'e ma ita py ojoua.
- ³ Avakue omoexakã 'rã pytũ anaa rupi,
ha'e hexakãa opaa peve oo vy oeka 'rã ita
porãgueve
pytũ anaa py oĩ va'e.
- ⁴ Ojo'o 'rã yvy oike aguã avakue ikuaiia gui mom-
byry,
oguata va'e kuery oikuaa e'ýa py.
Ha'e kuery ikuaiia gui mombyry 'rã ikuai
peteĩ ixã re ovava-vava oinya py.
- ⁵ Yvy gui ma oiko 'rã tembi'u,
ha'e rã iguýry ma tata py okaiague rami 'rã
ojekuaa.
- ⁶ Ha'e pygua ita re oĩ 'rã safira,
ha'e gui iku'ikue re ma ouro oĩ.
- ⁷— Ha'e va'e tape ma guyra jo'ua kuery ndoikuuai,
taguato ndoexai va'e ae.
- ⁸ Vixo inharõ ha'e tuvixa va'e nopyrõi 'rã ha'e rupi,
guary ra'y voi ndoaxai ha'e rupi.

- 9 — Avakue opo py tembiporu oguereko va'e py
ombota-mbota 'rã ita re,
ha'e vy yvyty ikuai va'e oipe'a 'rã iguy peve.
- 10 Ombokua 'rã ita rupi
oexa aguã hepyve va'e oĩ va'e ha'e javi.
- 11 Omboty 'rã yy rape ikuai va'e peteïve henda py
otyky e'ŷ aguã rami,
hexakãa katy oguerupa aguã hi'ã py oĩ
va'ekue.

*Arandu anhetẽ va'e me'ëa Nhanderuete oikoa re
Jó ijayvuague*

- 12 — Ha'e rã 'arandua ma mamo tu oĩ?
Mamo tu oĩ mba'emo jaikuaa ete aguã?
- 13 Ha'e va'e repy ma avave ndoikuuai,
yvy re avakue ikuiaia rupi ndojouai 'rãe.
- 14 Yvykua vaikue aipoe'i: “Xere ma ha'e nunga
noĩ”,
ye'ẽ voi “Xea py noĩ avi” he'i.
- 15 Ouro oiky'a'o pyre re teĩ nda'evei jajogua aguã,
neĩ prata voi nda'evei hekovia japeja aguã.
- 16 Mba'eta ouro Ofir gui ogueru pyre ha'e javi gui
ovareve va'e,
ônix hepyve va'e ha'e safira ikuai va'e gui
guive.
- 17 Ouro teĩ ma 'arandu rami e'ŷ iporã va'e, neĩ
itaendy ma voi.
Jeguua ouro oiky'a'o pyre guigua re teĩ nan-
hamboekoviai 'rã.
- 18 'Arandu oĩa py ma ita coral ha'e itaendy ikuai
va'e re nhanderexaraipa 'rã.
Pérola jajoua gui voi ha'eveve 'arandu jarekoia.
- 19 Etiópia gui topázio herua teĩ ha'e va'e ma 'arandu
rami e'ŷ ovare,

- neñ ouro iky'a e'ŷ va'e voi.
 20 — Ha'e nunga rupi magui tu ou 'arandu?
 Mamo tu oĩ mba'emo jaikuua aguã?
 21 Mba'eta temimoingo ikuai va'e oexaa gui onho-mia,
 guyra yvate rupi oveve va'e gui guive.
 22 Yvykua vaikue ha'e manoaa aipoe'i:
 “Oreapyxa py roendu rive 'arandu oikoa”,
 he'i.
 23 Nhanderuete anho oikuua 'arandua katy tape
 oo va'e,
 ha'e ae oikuua oĩa.
 24 Mba'eta ha'e ma yvy apy rupi peve oexa pota,
 yva guýry ikuai va'e ha'e javi 'rã oexapa.
 25 Yvytu poyia ha'evea'i rami Nhanderuete oeja
 yy guive ituia peve oa'anga jave,
 26 oky nhavõ guarã oeja,
 ha'e yapu overa reve va'e raperã omoĩ jave,
 27 ha'e va'e jave py ae 'arandu oexa avi vy oikuua
 uka raka'e.
 Ha'e va'e re oikuua pota ma vy omoĩ atã raka'e.
 28 Ha'e vy aipoe'i avakue pe: “Pendu ke:
 SENHOR renonde pejererokyjea ma
 pene'arandurã oĩ,
 ha'eve'ŷ va'e gui pejepe'a vy 'rãe peikuaa
 mba'emo”, he'i.

29

- Jó ymave rupi oiko porãague re ima'endu'aague*
¹ Jó ijayvuve tema. Ha'e vy aipoe'i:
 2 — Ai! Kueve'igua jaxy re aikoague rami ju aiko
 va'e rire,
 Nhanderuete xere opena javegua re rami!

- ³ Ha'e jave ma xeakā áry rupi omoexakā va'ekue,
ha'e hendy va'e xererekō heravy ramo pytū
rupi ete aguata aikovy va'ekue.
- ⁴ Ha'e jave ma xerexaī aikovy va'ekue,
xero áry rupi Nhanderuete xerayvua oexa
uka rā.
- ⁵ Ha'e jave ma Ipo'akapa va'e oiko teri xereve,
ha'e xera'y kuery voi xeyvýry teri ikuai.
- ⁶ Kamby py xepy ajoī ainy va'ekue,
ha'e itaova gui yakā'i oxyry va'e rami azeite
oxyry oiny jave.
- ⁷ — Tetā kora rokē katy aa,
ha'e tetā mbyte py guive aguapy ainy aguā
ome'ēa jave
- ⁸ kunumigue xerexa vy ojepe'apa,
ha'e tujakue'i voi opu'āmba okuapy va'ekue.
- ⁹ Yvatekueve voi ijayvu ta vy ojuru ojoko okuapy
va'ekue,
ojuru re opo omoī reve.
- ¹⁰ Omboetevepy kuery ayvu nonhenduvei
va'ekue,
ijurupy py inhapekū nomyīvei ramo.
- ¹¹ Xeayvua rendua kuery ma “Ovy'a va'e” he'i
okuapy xevy,
xerexaa kuery voi xere ima'endu'a porā
va'ekue.
- ¹² Mba'eta xee ma iporiaukue'i ojapukai rā aepy
va'ekue,
tyre'ŷ opytyvōarā oguerekō e'ŷ va'e kuery
guive.
- ¹³ Omano ta va'e voi xereroayvu porā va'ekue,
xee ajapo avi va'ekue imeve'ŷ va'e kuery oku-
raxō py ov'y'a aguā rami.

- ¹⁴ Xejee amoĩ va'ekue teko porã,
 ha'e va'e anho oĩ va'ekue xeao rami.
 Manto ha'e akã nhovãa rami oĩ va'ekue
 ha'evea rami joe apenaa.
- ¹⁵ Xee ajeapo va'ekue ára reveguá e'ŷ rexarã rami,
 hi'u rovaikue'i va'e pyrã rami guive.
- ¹⁶ Iporiaukue'i pe ma tuu aiko va'ekue,
 oikuaapy e'ŷ ikuai va'e re guive aikuua pota
 va'ekue.
- ¹⁷ Ha'e rã porayvu e'ŷ va'e kuery raĩ'y kã ma xee
 amopẽmba va'ekue,
 ha'e kuery raĩ gui xee araa jepe va'ekue
 omokõ ta va'e.
- ¹⁸ Xee aipoa'e va'ekue: "Xero py ae 'rã amano,
 amboetave 'rã xe'ára ita ku'i rami.
- ¹⁹ Xee aiko 'rã yy peve yvyra rapo ový va'e rami,
 ha'e pyávy hakã re yxapy oĩa va'e rami.
- ²⁰ Xemboeteave tema 'rã,
 ha'e xepo py xerapa ajopy atã tema 'rã
 aikovy", ha'e va'ekue.
- ²¹— Xeayvu rã ojapyxaka va'e kuery oarõ okuapy
 va'ekue amogeta aguã,
 xeayvua oendua rupi okyirirõ pavẽ va'ekue.
- ²² Xee xeayvupa ma rã naxembovai kuaai va'ekue.
 Ha'e kuery áry xeayvua oguejy va'ekue yxapy
 rami.
- ²³ Ha'e kuery xerarõ va'ekue oky re rami,
 ojuru oipe'a reve oarõ okuapy xeayvu aguã,
 haku-a ára py oky oarõ va'e rami.
- ²⁴ Ha'e kuery nda'ipy'a guaxui jave ha'e kuery pe
 xerory va'ekue.
 Xerova omoexakã rã xererovy'a va'ekue.
- ²⁵ Ha'e kuery raperã xee aiporavo va'ekue huvixa
 rami aguapy ainy reve,

huvixave oxondaro kuery mbyte oĩ va'e rami,
ha'e ojae'o va'e kuery mbopy'a porãa rami
ajoguereko va'ekue.

30

Jó iporiaua oguerojae'oague

- 1 — Ha'e gui aŷ ma xegui kyr̄igueve xejojai okuapy,
ha'e va'e kuery ru ma neĩ jagua reve xerymba
vexal'i kuery oarõ aguã katy
namondoukai va'ekue ri.
- 2 Mba'eta ha'e kuery inhangaipa ramo
mba'e nunga py tu xevy ovare 'rãgue ipo
mbaraetea?
- 3 Jexavai ha'e karuai gui ha'e kuery ikangypa
okuapy.
Oixu'u okuapy mba'emo pirukue,
yma ma tekoa noĩveia rupi mba'emo vaikue
ikuai va'e guive.
- 4 Jai rogue ha'e yvyra'i rogue rive oipo'o,
zimbro rapo guive ho'u okuapy.
- 5 Avakue mbyte gui omoxẽa.
Ha'e kuery rovai ojapukaia okuapy imonda
va'e rakykue ojapukaia rami.
- 6 Yvy'ã peguy kuaray'ã reia rupi ikuai,
yvykua ha'e itakua rupi.
- 7 Onhendu okuapy jai rupi,
juu guy rupi rive ijaty okuapy.
- 8 Inhakã porã e'ŷ va'e ra'y kuery ikuai,
ima'endu'apy e'ŷ regua,
ijyvy gui omoxẽmba pyre.
- 9 — Ha'e rã aŷ ma ha'e kuery xembojaru rei
okuapy,
ojojai pyrã aiko ramo.

- ¹⁰ Xegui ojeguaru vy ojepe'a 'rã mombyry'i,
ndokyjei guive xerova re onyvõ aguã.
- ¹¹ Mba'eta Nhanderuete ombopyu xerapa xã xem-
bojexavai vy.
Ha'e ramo ha'e kuery ndojejokovei ma
xerenonde.
- ¹² Ha'e rami vy xeaxu e'ÿa re opu'ã okuapy xe-
moanha rei aguã,
ha'e xerovai jogueroayvu okuapy xemomba
vy ou aguã re.
- ¹³ Ombovaipa okuapy xee aa aguã va'e rupi,
xeapo ajexavai aguã rami.
Ha'e kuery ma oipytyvõ pyrã e'ÿ ae.
- ¹⁴ Xere ou okuapy tetã kora oitypaague rupi oike
va'e rami,
ha'e kuery ouve tema 'rã ivaipaague mbyte
rupi.
- ¹⁵ Xere ou xemongyjearã,
yvytu ombovevepa rire omboetepy aikoague.
Avy'aague oaxa ma ov y arai rami.
- ¹⁶ — Aÿ ma xepy'apy py anhenhandu xenhe'ë
ivaipa maa rami.
Xembojexavaia ára ou ma xere.
- ¹⁷ Pyávy xekägue hu'ümba ha'e ovapa va'e ramigua
aendu,
ha'e mba'emo vai xexu'u va'e ndopytu'ui.
- ¹⁸ Mba'emo vai aendu va'e gui xeao voi ojepokapa
rei 'rã,
mba'emo vai xejyryvipy 'rã xeao puku jyryvi
rami.
- ¹⁹ Xeruete, ndee ae xemombo yapo py,
ha'e ramo yvy ku'i ha'e tanhimbu rami aiko.
- ²⁰ Ndevy ajapukai rã ndee naxembovai.

- Apu'ã ha'amy teĩ rema'ẽ rive xere.
- 21 Porayvu e'ŷ va'e renhemoingo xevy.
Ha'e vy ndepo mbaraete reve repu'ã xere.
- 22 Rejapo yvytu xereupi vy hi'áry xereraa aguã rami.
Xemou'ũmba ára vai revovo rupi.
- 23 Ha'e gui xee aikuaa amano aguã katy xereraa, oikove va'e ha'e javi ikuai aguã katy.
- 24 — Ha'e rami avi yty áry ava omomboa imoinyague gui nokuave'ẽi 'rã teve, ojexavaia gui ndojapukai ratãi 'rã teve ipy-tyvõarã pe?
- 25 Xee ndajae'oi va'ekue teve ojexavai va'e re, ha'e xenhe'ẽ py namboaxyi teve oiko axy va'e?
- 26 Iporã va'e xee arõ teĩ xere ou mba'emo vai.
Hendy va'e arõ va'e 'rãgue py pytã anho ou xere.
- 27 Xeryepy rupi omyï va'e ndopytu'ui, xere aiko axya ára ou ramo.
- 28 Xeporiau aikovy kuaray ojope e'ŷa rupi.
Heta va'e kuery mbyte py ajerure ha'amy xepytyvõa aguã.
- 29 Xee ma jagua-tuvy nhe'ẽ ryke'y, ha'e guyra nhandu ryvy aiko.
- 30 Xepire hu'ũmba reve ho'apa xegui, xekãgue voi okai merami xepire raku gui.
- 31 Ha'e nunga rupi ixã reta va'e ambopu 'rãgue py xeraxẽ ainy xepy'a vai vy, ha'e mimby amonhe'ẽ 'rãgue py ojae'o va'e rami anhendu.

31

Jó anhetẽ rupi oikoa re ijayvuague

- 1 — Xerexa reve ajapo ma areko aguã.
Mba'exa tu ha'vy xee apena reia rupi ama'ẽ ta
kunhataĩ re?
- 2 Ha'e rami rire mba'e 'rã tu xee ajopy Nhan-
deruete yvategua gui,
mba'e nunga tu yvate oĩa gui ome'ẽ 'rã xevy?
- 3 Mba'eta heko vai va'e peguarã omoõ okanhy
aguã,
mba'emo vai apoa pe omoõ oiko axy aguã.
- 4 Ha'e rã xee aikoa ma Nhanderuete oexapa,
oipapa aguataa ha'e javi.
- 5 — Ha'e gui aiko porã merami rive va'e rire,
ha'e ajokore aguã katy xepy inhakuã ovy va'e
rire,
- 6 (Nhanderuete toikuaa pota porã xere,
anhetẽ rupi aikoa oikuaa aguã,)
- 7 xapy'a rei tape porã gui ajep'e vy
mba'emo aexa va'e rupi rive anhembopy'a,
e'ŷ vy xepo re iky'a va'e oĩ va'e rire,
- 8 ha'e rami ri ramo amboae kuery rive to'u xee
ama'etÿague gui,
ha'e xemba'ety rupi henhoõ va'ekue tomon-
doropa rive.
- 9 — Xapy'a rei xekuraxõ py kunha mboae re an-
hembotavy uka,
ha'e xea katygua rokẽ py ama'ẽ mbeguea rupi
aiko va'e rire,
- 10 ha'e ramo xera'yxy tojapo tembi'u amboae ava
pe,
hexeve amboae tonheno.
- 11 Mba'eta ha'e rami aiko va'e rire nda'evei ete
'rãgue,

- ajejavyague re huvixa kuery xembopaga
'rāgue.
- 12 Ha'e ramigua ma tata rami ombovaipa 'rāgue
opa peve,
omomba 'rāgue mba'emo areko va'e ha'e javi.
- 13 — Xapy'a rei xerembiguai ava e'ŷ vy kunha
mba'e
ha'eve'ŷa rami xee areko va'e rire,
- 14 mba'e tu xee ajapo 'rāgue Nhanderuete xere
opu'ã ramo?
Xere oikuua pota ramo mba'exa tu xee ambo-
vai 'rāgue?
- 15 Mba'eta xeryru'i py aĩ aguã xemoingo va'ekue
e'ŷ ri ty'y ha'e kuery voi omoingo raka'e?
Ha'e e'ŷ teve nhanderyru'i py nhanemoingo
pavē va'ekue?
- 16 — Xapy'a rei iporiaukue'i oipota va'e name'ẽi vy
imeve'ŷ va'e ndaexa pyxovei aguã rami ajapo
va'e rire,
- 17 ha'e rami e'ŷ vy xee ae'ia py akaru va'e rire
tyre'ŷ pe amboja'o e'ŷ re,
- 18 (mba'eta xekunumi guive xereve ae areko tuu
rami,
ha'e xeryru'i py aĩ guive imeve'ŷ va'e rerekaoa
aiko,)
- 19 xapy'a rei ijao e'ŷ va'e ojexavai rã ama'ẽ rive va'e
rire,
e'ŷ vy onheovã aguã oguereko e'ŷ vy ojexavai
rã,
- 20 xapy'a rei xerymba vexa'i rague py namboakui
ramo
ha'e kuery opy'a py ndaxereroayvu porãi va'e
rire,

- 21 xapy'a rei okẽ py joguerekao kuery ikuai va'e
 xemboeko porã reve teĩ
 tyre'ŷ rovai xepo aupti va'e rire,
 22 ha'e rami ri ramo to'a rive xeaxi'y kāgue,
 ha'e tomboia xejyva oñague gui.
 23 Mba'eta ha'e rami va'e rire Nhanderuete xem-
 bopaga aguã gui ndaxerekorâvei 'râgue,
 hexakāa rive xee ndaropo'akai 'râgue.
 24 — Xapy'a rei ouro re rive ajerovia vy
 ouro oiky'a'o pyre pe "Ndere ajeko" ha'e va'e
 rire,
 25 xapy'a rei arekopa etea
 ha'e xepo py ajou reta va'e arovya'a va'e rire,
 26 xapy'a rei kuaray rexakāa re,
 e'ŷ vy jaxy hendy porãa re ama'ẽ reve
 27 xepy'a py ajekore nhemia rupi
 xepo py ayvua aikuua uka va'e rire,
 28 ha'e va'e py voi ajejavy 'râgue joguerekao kuery
 xembopaga aguã rami,
 Nhanderuete yvategua e'ŷ amboete rire.
 29 — Ha'e gui xere ija'e'ŷ va'e kuery ojexavai rã
 aexa vy ndavy'ai,
 ha'e kuery re mba'emo vai oiko rã ndarovy'ai.
 30 Ha'e rami avi ndarojejavyi xejuru
 ha'e kuery omano aguã re ajerurea py.
 31 Ha'e xero py ikuai va'e aipo nde'i:
 "Xo'o ha'e nome'ẽ porãi rire ndajakaru porãi",
 nde'i,
 32 mba'eta xee ndaejai yvy mboae guigua tape py
 rive pytû oaxa aguã,
 xerokẽ aipe'a jepi riae oguata va'e kuery
 amovaẽ vy.
 33 Ha'e gui Adão rami e'ŷ xepy'apy py nanhomí

xereko vaia ha'e ajejavya.

³⁴ Mba'eta xee ma heta va'e kuery gui ndakyjei,
xeretarā kuery xere ija'e e'ŷa naxemongyjei
akyrirī ha'e xero gui naēi aguā rami.

³⁵ Xeayvu renduarā oĩ va'e rire!

Ma'ẽ, apy ma oĩ xereko regua xerery reve
ambopara va'ekue!

Ipo'akapa va'e xembovai va'e rire,
ha'e rami e'ŷ vy xerovaigua ombopara va'e
rire xere ijayvua!

³⁶ Ha'e va'e kuaxia para araa 'rāgue xeaxi'y áry,
xeakā áry ajokua 'rāgue coroa rami.

³⁷ Nhanderuete pe xee aikuaa uka 'rāgue aikoa
ha'e javi.

Ha'e oĩa py ajexa uka 'rāgue yvateve va'e rami.

³⁸ — Xapy'a rei xemba'ety káuxa xere ijayvua,
ha'e yvy aikaraĩ heravyague káuxa ojae'oa
va'e rire,

³⁹ xapy'a rei ijaju ma ramo ha'u ombo'eaxo va'e
kuery pe ha'evea rami apaga e'ŷ re,
ha'e ijopyarā va'ekue amomba va'e rire,

⁴⁰ ha'e rami ri ramo trigo 'rāgue py juu rive toiko
xevy,
ha'e cevada 'rāgue py toiko trigo ramigua rive
— he'i.

Apy ma opa ma Jó ijayvuague.

32

*Jó ha'e irū kuery mboapy ikuai va'e pe Eliú ivai-
ague*

¹ Ha'e gui mboapyve avakue opytu'u ma Jó on-
hemboeko porāa rupi ijayvu rā omboavaia gui.

² Ha'e ramo buzita Baraquel ra'y Eliú, Rāo ramymino regua ju ivai Jó pe, Nhanderuete gui eteve voi onhemboeko porāvexe ramo.

³ Irū kuery mboapyve pe voi ivai, mba'eta ha'e kuery nombovai kuaavei va'eri Jó rovai tema ijayvu rire.

⁴ Ha'e gui Eliú ma Jó gui kunumive va'e vy oarō ranhe ixupe ijayvu aguã.

⁵ Ha'e rami avi mboapy avakue nombovai kuaaveia Eliú oexa vy ivaive oiny.

Jó pe ombovai ypy vy Eliú ijayvuague

⁶ Ha'e gui buzita Baraquel ra'y Eliú aipoe'i:

— Xee ma xekunumive va'e, ha'e rā peẽ ma pendetujakueve meme.

Ha'e rami vy xee arō ranhe, pendua py xee aikuaa va'e amombe'u aguã ndaxepy'a guaxui vy.

⁷ Xee aipoa'e va'ekue: “Heta ára ha'e ma'etý mbovy e'ý oguereko va'e kuery ranhe ta'ijayvu 'arandu re nhombo'ea rupi”, ha'e va'ekue.

⁸ Ha'e rami teĩ anhetē avakue re oĩ 'rā peteĩ Nhe'ẽ, mba'eta Ipo'akapa va'e oipejua py rive nhomo'arandu 'rā.

⁹ Hi'arandukueve ma tujakueve anho e'ý ikuai, tujakue'i anho e'ý 'rā oikuua ha'evea ramigua.

¹⁰ Ha'e nunga rupi xee aipoa'e: “Pejapyxaka ke xere, ha'e gui xee voi amombe'u 'rā aikuua va'e”, ha'e.

¹¹ — Ma'ẽ, xee amoĩ porā pendeayvuague, pendeayvua re ajapyxaka pota porā pendeayvurā re teri peikuaa pota peiny reve.

¹² Ha'e gui pendeayvu aendu rā

peẽ kuery peteĩve ma voi ndapeikuaa ukai Jó
 ha'eve'ŷa rami ijayvua,
 napembovai kuaai pekuapy ha'e ae oikuaa
 rami ijayvu rã.

¹³ Ha'e gui nda'evei penhemboeko porã ucaa rupi
 aipopeje aguã:

“Ore rojou ma 'arandu.

Nhanderuete ju tombovai, avakue ma
 nda'evei”, peje aguã.

¹⁴ Ma'ẽ, xevy pe'ŷ ha'e ijayvu rire
 xee ma pendeayvuague rupi e'ŷ 'rã ambovai.

¹⁵ — Jó, neirũ kuery mboapyve onhemondyi vy
 nanembovai kuaavei,
 ha'e kuery pe oata ma merami ayvu.

¹⁶ Ha'e gui xee pa arõve ta ha'e kuery nda'ijayvui
 ma rire?

Mba'eta okyririmba ma, peteĩ henda py ma voi
 nombovaivei vy.

¹⁷ Ha'e rami vy xee ju 'rã xeayvu,
 amombe'u 'rã aikuaa va'e.

¹⁸ Mba'eta heta areko xeayvu aguã,
 xenhe'ẽ oĩ va'e ae xemokyre'ŷ ramo.

¹⁹ Mba'eta xepy'apy rupi aendu vinho ryru
 mba'emo pirekue guigua ipyau va'e
 ramigua,
 onhembotypa vy oxoro rai'i va'e rami.

²⁰ Ha'e rami vy tove taxeayvu oẽmba ový aguã.
 Aipe'a 'rã xejuru rombovaia rupi xeayvu vy.

²¹ Xee ma peteĩ rive joegui ayvuvea rupi e'ŷ 'rã
 xeayvu,

neĩ avakue pe ajejou porã ucaa rupi e'ŷ guive.

²² Mba'eta xee ma ajejou porã ucaa rupi ndax-
 eayvu kuaai.

Ha'e rami e'ŷ va'e rire xemoingoare xereraa
voi 'rāgue.

33

Jó pe Eliú ijayvu eteague

- 1 — Ha'e gui Jó, endu ke aikuaa va'e re xeayvu rā,
ejapyxaka xeayvua ha'e javi re.
- 2 Aŷ ma xeayvu ta,
xejuru py xeapekū ijayvu aguã rami oĩ.
- 3 Xeayvua oikuaa uka 'rā xepy'a re anhetē va'e
anho oĩa,
xeayvu 'rā mba'emo aikuaa va'e re anho.
- 4 Nhanderuete Nhe'ẽ ae xemoingo va'ekue,
Ipo'akapa va'e oipejua py rive ome'ẽ
xerekoverā.
- 5 Xapy'a rei rembovai kuaa vy ke xembovai,
ereko katu reikuaa va'e xevy pe remombe'u
va'erā.
- 6 Ma'ẽ, Nhanderuete renonde ma ndee ramigua ae
avi aiko,
Yapo gui avi xeapo rire.
- 7 Ha'e ramo xee noromongyjei 'rā,
nde'áry noĩ 'rā xepo poyia.
- 8 — Anhetē xee aendua py ndeayvu rā
ange aendu kuri
- 9 “Ha'eve va'e aiko, ajejavy va'e'ŷ.
Xeky'a va'e'ŷ ha'e xerekovo vai va'e'ŷ”, 're ramo.
- 10 “Ma'ẽ, Nhanderuete xembopagaa rupi onhea'ã,
hovaigua aikoa rami xekuaa vy.
- 11 Ha'e rami vy yvyra pa'ũ py omboty xepy,
ha'e oikuaa pota 'rā aikoa ha'e javi re”, 're
va'ekue.
- 12 Ha'e rami ndeayvuague ha'eve'ŷa ramigua ramo

- xee rombovai 'rã.
 Mba'eta avakue ikuai va'e gui Nhanderuete
 yvateve va'e.
- ¹³ Mba'e re tu ixupe ndeayvu ete vy
 "Peteīve henda py nerenhemombe'u porāi ri",
 're?
- ¹⁴ Ha'e rami 'rãgue py Nhanderuete ma peteī rami
 ijayvu ma vy
 teīgue ju 'rã omombe'u porāve.
 Ha'e rami teī ijayvua re avakue noendu porā
 potai 'rã.
- ¹⁵ Nhandevy pe oexa ra'u uka 'rã mba'emo, pyávy
 mba'emo jaexaa rupi,
 nhanderopeyi vaipa reve
 nhanderupa rupi jake jajupy jave.
- ¹⁶ Nhandeapyxa voi oipe'a vy
 nhanembo'e 'rã oipota va'e re,
- ¹⁷ ojapo aguā nhanhembopy'aa gui jajepe'a aguā
 rami,
 jajejou porā reia gui nhandereraa jepe aguā,
- ¹⁸ yvykua katy nhanderekove oo rã ojoko vy,
 kyxe py nhandejukaa gui guive.
- ¹⁹ — Nhanderupa rupi nhandetui ramo nhanem-
 bopaga 'rã haxy va'e py,
 nhanekāgue re haxy nhaendu riae va'e py.
- ²⁰ Ha'e ramo jajeguaru 'rã tembi'u gui,
 tembi'u hee va'e teī nhanenhe'ẽ py ndaja'uxei
 ae.
- ²¹ Nhandro'o oĩ porā va'ekue aŷ ndojekuaavei.
 Ha'e rã nhanekāgue ndojekuaai va'ekue ma aŷ
 ojekuaapa.
- ²² Nhanenhe'ẽ oo tema 'rã yvykua katy,

- nhanderekove onhemboja 'rā̄ ovy ipe'aarā̄
kuerya katy.
- 23 — Xapy'a rei ou 'rā̄ peteī̄ anjo nhandere ojerure
va'erā̄, mbovy e'ŷ ikuai va'e regua,
nhandevy oikuaa uka aguā̄ ha'evea ramigua
jajapo aguā̄.
- 24 Ha'e ramo Nhanderuete nhanemboaxy vy
aipoe'i 'rā̄ anjo pe:
“Eraa jepe ke, yvykua py ho'a e'ŷ aguā̄.
Ajou ma hepyrā̄”, he'i 'rā̄.
- 25 Ha'e rami rā̄ nhandro'o hexaī̄ ju 'rā̄ nhanekyrī̄
jave nhanembaraeeteague rami,
nhanekunumi jave jaikoague rami ae ju 'rā̄
jaiko.
- 26 Ha'e ramo jajerure 'rā̄ Nhanderuete pe, ha'e rā̄
nhanepytyvō̄ 'rā̄.
Ha'e ramo javy'a reve 'rā̄ jaexa Nhanderuete
rova.
Ha'e ramo nhanemboeko porā̄ ju 'rā̄.
- 27 Ha'e ramo avakue oendua py japoraei reve
aipoja'e 'rā̄:
“Ajejavy va'ekue, ha'eve'ŷa ramigua ajapo,
teī̄ apaga aguā̄ va'ekue rami e'ŷ guive xem-
bopagaa.
- 28 Nhanderuete ojogua xenhe'ŷ yvykua py ooa gui,
xerekove reve aexa aguā̄ hendy va'e”, ja'e 'rā̄.
- 29 — Ha'e va'e ha'e javi ma Nhanderuete ojapo
nhandevy mokoī̄gue, mboapykue mba'e,
- 30 yvykua gui nhanderekove ogueru ju aguā̄,
oikove va'e kuery moexakā̄ py
nhanderexape avi aguā̄.
- 31 Ha'e nunga rupi Jó, endu ke, ejapyxaka xeayvua
re.

Ekyrirī ke, ha'e rā xee xeayvu 'rā.

³² Ndee ndeayvu aguā rerekō ri vy xembovai.

Ndeayvu ke, mba'eta xee romboeko porāxe.

³³ Ha'e gui mba'eve ndererekoi ri ramo ejapyx-
akave tema xeayvua re.

Ekyrirī, ha'e rā rombo'e 'rā 'arandu re — he'i.

34

*Eliú Nhanderuete mboeko porāa rupi
ijayvuague*

¹ Ha'e gui Eliú aipoe'ive ju:

² — Pene'arandu va'e, pendu ke xee aikuua va'e.

Penembo'epaa va'ekue, pejapyxaka xeayvua
re.

³ Mba'eta nhandeapyxa py nhaendu kuaa 'rā ayvu,
nhandejuru py tembi'u heea nhaendu kuaa
rami avi.

⁴ Ha'evea ramigua jaiporavo 'rā nhandejeupe.

Jojavi 'rā jaikuua iporā va'e.

⁵ Mba'eta Jó aipoe'i: "Xereko porā va'eri
Nhanderuete oipe'a xevy guarā va'ekue.

⁶ Ha'evea rami aiko teĩ ijapu va'e rami xekuaa.

Xeai okuera va'erā e'ŷ oĩ, ajejavya oĩ ramo
e'ŷ", he'i va'ekue.

⁷ — Oiko 'rā nda'u ava Jó ramigua?

Mba'eta ha'e ma ojojai 'rā Nhanderuete, yy
oy'u va'e rami rive.

⁸ Ha'e rami vy onhemoirū 'rā oikovy ojapo vai rei
va'e kuery re,

avakue heko vai va'e kuery reve anho oiko.

⁹ Mba'eta aipoe'i: "Nhanderuete jarovy'a teĩ
mba'everā ndovarei nhandevy", he'i va'ekue.

- 10 — Ha'e nunga rupi peẽ avakue peneakã porã
va'e, pejapyxaka xeayvua re.
Nhanderuete ma peteĩve henda py ndojapo
vai 'rã,
Ipo'akapa va'e ha'eve'ÿa rami ndajoguerekoi
'rã.
- 11 Mba'eta ome'ẽ 'rãe jaikoague repy,
ojapo 'rã peteĩ-teĩ jaikoague repy jajou aguã
rami.
- 12 Anhetẽ ete, Nhanderuete ha'eve'ÿa rami ndoikoi
'rã.
Ipo'akapa va'e ndajoguerekoi 'rã ha'eve'ÿa
rami.
- 13 Mba'eta mava'e tu omoõ raka'e yvy re opena
va'erã?
Mava'e tu ipo py omboaxa raka'e ha'e javi
regua?
- 14 Xapy'a rei Nhanderuete ojee rive opena va'e
rire,
ha'e ojea katy onhe'ẽ ha'e pytuẽa oguerupa
va'e rire
- 15 to'o ikuai va'e ha'e javi omanomba 'rãgue,
ha'e yvyku'i ju jajeapo 'rãgue.
- 16 — Ha'e gui Jó, ndere 'arandu oĩ ramo endu ke
pova'e.
Ejapyxaka xeayvua re.
- 17 Ha'eve'ÿa rami joguerekoo va'e teve oĩ 'rã joe
opena aguã?
Mba'e re tu ha'vy ndee ndeayvu Heko porã
ha'e Ipo'akapa va'e ojejavya rami?
- 18 Huvixave oiko va'e pe nda'u "Mba'e vare'ÿ" 'ea
'rã teve?
Ha'e rami e'ÿ vy yvatekueve pe: "Pendeko vai
va'e" 'ea 'rã teve?

- ¹⁹ Yvatekueve rive oayvuve e'ŷ va'e pe katuve ma
nda'evei.
Ha'e ma iporiaukue'i gui ndoayvuvei 'rã
oguerekopa rei va'e kuery.
Mba'eta ha'e javive ma opo py ojapo va'ekue
meme ikuai.
- ²⁰ Ha'e kuery omano xapy'a va'erã meme.
Pytũ mbyte jave ha'e kuery oryryipa reve
oaxa 'rã,
ipo'aka va'ekue teĩ Ipo'akapa va'e jaexa e'ŷ
va'e ogueraa 'rã.
- ²¹ — Nhanderuete ma oma'ẽ 'rã avakue ikuia
rupi.
Ha'e kuery oguataa ha'e javi ha'e oexapa 'rã.
- ²² Jipoi pytũa neĩ kuaray'ã ana
mba'emo vai apoare kuery ixugui onhemi
aguã.
- ²³ Mba'eta Nhanderuete ma avakue reko re oikuaa
pota are e'ŷ teĩ
ojapo 'rã henonde ojexa uka aguã rami om-
boayvu aguã.
- ²⁴ Ha'e rami vy oikuaa pota e'ŷ re omopẽmba 'rã
imbaraete va'e kuery,
ha'e vy hekovia omoĩ 'rã amboae kuery.
- ²⁵ Ha'e kuery ikuiaia ha'e oikuaa ae vy
pyávy oity ramo omongu'i pyre ikuai.
- ²⁶ Pavẽ oexaa py
omoingo axy 'rã heko vai va'e ha'e javi reve,
- ²⁷ ixugui ha'e kuery ojepe'a rire,
peteĩve ma voi ndoikuaaxeit ixuguigua tape.
- ²⁸ Ha'e kuery ojapo Nhanderuete renonde ipori-
aukue'i ojapukaia onhendu aguã rami.

- Ha'e ramo oendu ae ojexavai va'e kuery
ojae'oa.
- 29 Nhanderuete okyrirī teī mava'e 'rā tu om-
bopaga?
Ngova omo'ā rā mava'e 'rā tu oexa, peteī
regua ha'e javi e'ŷ vy peteī ava teī?
- 30 Ha'e rami oiko heko vai va'e ipo'aka e'ŷ aguā,
ha'e oiko e'ŷ aguā heta va'e kuery mbo-
tavyarā.
- 31 — Xapy'a rei amongue aipoe'i 'rā Nhanderuete
pe:
“Aiko axy vaipa ma, ndajejavyei ma 'rā.
- 32 Xembo'e ke mba'emo xee ndaikuaai va'e re.
Ha'eve'ŷa rami ajapo va'ekue teī ndajapovei
ma 'rā”, he'i 'rā.
- 33 Ha'e rami rā Nhanderuete omboekovia kuaa
aguā nda'u
oporandu 'rā teve ndee reipotaa e'ŷ vy ndee
ndereipotaia re?
Ndevy pe teve aipoe'i 'rā: “Ndee ae eiporavo,
xee'ŷ.
Emombe'u ke reikuua va'e, ndeayvu ke”, he'i
'rā teve?
- 34 — Avakue hi'arandukueve omombe'u 'rā xevy,
inhakā porā va'e kuery xeayvua re ojapyxaka
vy aipoe'i 'rā xevy:
- 35 “Jó ma oikuua vy e'ŷ ijayvu,
ijayvua re 'arandua noĩ”, he'i 'rā.
- 36 Ha'e nunga rupi tove Jó reko re toikuua pota opa
peve,
heko vai va'e rami ombovai rire.
- 37 Mba'eta ojejavya áryve omoĩ Nhanderuete re
opu'ā rei aguā.

Nhanembyte py ojepopete ombojaru reia
rupi,
ha'e Nhanderuete rovai ijayvu reta rive.

35

Eliú “Ojerovia e'ŷ va'e kuery ojexavai vy ojapukai teĩ Nhanderuete noendui”, he'iague

- ¹ Eliú aipoe'ive ju:
- ² — Ha'evea rami teve aipo're:
“Nhanderuete gui xereko porāve”, 're va'ekue?
- ³ Mba'eta aipo're: “Mba'e nunga py tu xereko porāa ovare?
Mba'e tu xereko porāa py ajouve 'rā ajejavya py ajou va'e gui?” 're va'ekue.
- ⁴ Ha'e ramo xee rombovai 'rā,
ndee ha'e neirū kuery guive.
- ⁵ Ema'ẽ yva re ha'e exa.
Exa pota nde'áry rupi arai yva re ikuai va'e re.
- ⁶ Rejejavya py mba'e nunga py tu hexe rejapo vai?
Nderekvaia hetave ovvy rā mba'e tu rejapo hexe?
- ⁷ Ha'e rami e'ŷ vy nderekvaia porāa py mba'e tu reme'ẽ ixupe?
Mba'e tu ojopy 'rā ndepo gui?
- ⁸ Ha'e rami 'rāgue py nderekvaia ma avakue ndee ramigua pe ae 'rā ojapo vai.
Ha'e nderekvaia porāa ma voi ha'e rami ae avi avakue ra'y kuery pe anho 'rā ojapo porā.
- ⁹ — Ha'e gui avakue omoingo axya vaipa rā haxẽ 'rā,
ha'e vy ojapukai 'rā ipo'aka va'e kuery po gui ogueraa jepea aguã.

- 10 Ha'e rami teĩ avave rei aipo nde'i 'rã: "Mamo tu
oĩ Nhanderuete xemoingoare,
pyávy avy'a reve aporaei aguã ome'ẽ va'e?
11 Ha'e ma yvy rupi vixo ikuai va'e gui nhan-
derekombo'eve va'e,
ha'e guyra yvate rupi oveve va'e gui
nhanemo'aranduve va'e", nde'i.
12 Ha'e kuery ojapukai teĩ ha'e nombovai,
gueko vaia rupi rive onhembovate ramo.
13 Ojapukai rive ramo Nhanderuete noendui 'rã,
ha'e kuery re Ipo'akapa va'e noma'ẽi 'rã.
14 Jó, ndee ma Nhanderuete nderexaia rami
ndeayvu,
ha'e rã henonde ma ndereko ojekuaapa.
Ha'e nunga rupi earõ hexe.
15 Aÿ peve Nhanderuete opoxya rupi nanhom-
bopagai,
neĩ heko vai va'e re ndoikuua potai teri ramo
16 ndejuru reipe'a vy ayvu ovare'ŷ va'e rupi
ndeayvu.
Ndeayvu reta ma, reikuua vy e'ŷ.

36

*Eliú "Avakue ojexavaia py Nhanderuete oikuua
uka 'rã iporã va'e", he'igue*

- ¹ Eliú ijayvuve tema. Ha'e vy aipoe'i:
²— Ejapyxakave'i ranhe, ha'e rã amombe'u porâve
'rã ndevy
Nhanderuete amboeko porâa rupi xeayvu
aguã arekove teri va'e.
³ Mombyry guí 'rã aru xe'arandurã
Xemoingoare amboeko porã aguã.

⁴ Mba'eta anhetẽ, xeayvu ma rive'ŷ.

Ndereve oĩ va'e ma mba'emo oikuaapa va'e.

⁵ — Ne'exa, Nhanderuete ma tuvixa ete va'e.

Ha'e rami teĩ nopena e'ŷi 'rã peteĩve re.

Oikuaa py avi tuvixa ete va'e oiko.

⁶ Ndogueraa jepei 'rã heko vai va'e rekove,

ha'e rã ojexavai va'e kuery ma ha'evea rami
'rã oguereko.

⁷ Ndopytu'ui 'rã heko porã va'e kuery re oma'ěa
gui.

Ha'e rami 'rāgue py omboyvate vy huvixave
kuery reve

omboguapy 'rã henda openaaty py raka'e rã
peve.

⁸ Xapy'a rei ha'e kuery corrente py ombo'aague py
'rã ikuai,

ixã imoingo axyarã py ojokuaa rire.

⁹ Ha'e rami ha'e ojapo 'rã ha'e kuery ha'eve'ŷa rami
ojapoague oikuaa aguã,

ojejou porã reia rupi ikuai rire.

¹⁰ Ha'e kuery apyxa oipe'a 'rã ombo'e aguã.

Ha'e rami vy ha'e kuery pe ijayvu 'rã heko vaia
gui ojeko rerova aguã.

¹¹ Xapy'a rei ha'e kuery onhe'ẽ rendu ha'e ixupe ju
ikuai ramo

opaa py oiko 'rã ha'e kuery ov'y'a aguã ára,

ha'e ma'etŷ mba'emo re ov'y'a rei okuapy
aguã.

¹² Ha'e rã ha'e kuery noendu potai ri ramo

hu'y guaxu py rami onhyvõa 'rã,

ha'e ramo omano 'rã hexa ogue reve.

¹³ Opy'a py heko vaia anho omoĩ va'e ma ojeupe
guarã omboaty 'rã poxya.

- Nhanderueteombo'a uka teī ndojapukai 'rā
okuapy heraa jepearā va'ekue pe.
- ¹⁴ Ha'e rami vy kunumi teri reve teī omokanhy 'rā
guekove.
Omano 'rā avakue ta'angaa pegua itavy rei
va'e mbyte py.
- ¹⁵ Ha'e rā ojexavai va'e kuery ma ha'e ogueraa jepe
'rā ojexavaia py ae oeko mbo'e vy,
mba'eta ombojexavaia rupi oipe'a 'rā ijapyxa.
- ¹⁶ — Ha'e rami ae ndee voi reiko axya gui Nhan-
deruete ndepe'axe avi
peteīhenda tuvixaa py, reiko axy ve'ŷ aguā py,
ha'e rekaru aguā mesa áry tembi'u hee va'e
anho oĩa py.
- ¹⁷ Ha'e rā ndee ma renhemonyē heko vai va'e
kuery reve repaga aguā.
Ha'e nunga rupi nderupity 'rā ndejou vaia
ha'e nembopagaa aguā anho.
- ¹⁸ Enheangu ke ha'vy ipoxya rendua py rejojai rei
e'ŷ aguā,
ejepe'a ukaeme guive "Xerekovia heta
ome'ea" 're vy rive.
- ¹⁹ Rejae'o rei ha'e opa mba'e py renhea'ā ramo rive
nda'u
nemboaxy 'rā rejexavaia gui reo jepe aguā?
- ²⁰ Earō eme eikovy pytū pyguarā,
mba'eta heta ikuaiague gui oipe'apaa heravy
aguā ae oĩ.
- ²¹ Enheangu ke teko vai re reo e'ŷ aguā,
ha'e va'e pe "Jexavai gui ha'eveva va'e" 're vy
rive.
- ²² Ma'ẽ, Nhanderuete opo'akaa py yvate ete va'e
ojekuaa!

Mava'e porombo'ea 'rã tu ha'e rami oiko?

- ²³ Mava'e tu omboeko mbo'e ta,
ha'e'ŷ vy ixupe "Ha'eve'ŷa rami rejapo" he'i
ta?

Nhanderuete yvate etea re Eliú ijayvuague

- ²⁴— Nema'endu'a porã Nhanderuete rembiapo
avakue pavẽ oguerovy'a va'e re.
- ²⁵ Ha'e nunga re avakue ha'e javi oma'ẽ vy
mombyry gui ojou porã 'rã okuapy.
- ²⁶ Ma'ẽ, Nhanderuete ma yvate ete va'e, jaikuaa
aguã rami e'ŷ.
Oikoa ma'etŷ guive ndajaipapa kuaai 'rã.
- ²⁷ Mba'eta ojea katy ogueru 'rã yy tykyrã,
yvyxĩ guiombo'oky aguã.
- ²⁸ Ha'e rami vy arai gui onhoẽ 'rã
avakue áry otyky reta va'erã.
- ²⁹ Amongue nda'u oikuua 'rã ri marã rami pa arai
oipyo heravya,
yapu guive oĩa gui omonhendua?
- ³⁰ Ma'ẽ, ha'e va'e áry rupi oexa uka 'rã imondovy
nhemboxi,
ye'ẽ typyvea ha'e javi rupi peve omoexakã
va'erã.
- ³¹ Ha'e nunga py oguereko 'rã yvy regua ikuai va'e,
ha'e vy ha'e kuery pe ome'ẽ 'rã tembi'u oata
aguã rami e'ŷ.
- ³² Opo py overa va'e ojopy reta vy
omombo 'rã ngovaigua kuery re.
- ³³ Ára vai revovo voi oikuua uka 'rã heko,
mba'eta nda'evei etea oexa uka 'rã ha'eve'ŷa
rami joguereko va'e rovai.

37

- ¹ — Ha'e nunga re xema'endu'a vy xekuraxõ
 oryryi rei,
 opo-opo guive, oĩaty gui oẽ ta merami.
- ² Pendu pota ke Nhanderuete guigua yapu re,
 ijuru gui hevovo va'e onhendu va'e re.
- ³ Yva guy ha'e javi rupi gui omondouka 'rã
 ojea gui overa va'e reve yvy apy peve.
- ⁴ Ha'e va'e rire ijayvu atã nhendu 'rã,
 yvatevea py onhemboxi 'rã hyapu reve.
 Ha'e ndopoi e'ŷi 'rã overa va'e ijayvua onhen-
 dua rupi.
- ⁵ Nhanderuete ijayvu reve hyapu 'rã nhomondyi-
 paa rupi.
 Ojapo 'rã mba'emo tuvixa va'e, jaikuua e'ŷ
 va'e.
- ⁶ Mba'eta yro'y apĩ pe aipoe'i 'rã: "He'a ke yvy áry",
 ha'e gui oky ha'e oky xapy'a-py'a va'e pe ma
 "Penembaraeeteve ke", he'i 'rã.
- ⁷ Ha'e rami vy ojapo 'rã avakue ha'e javi po oĩ rive
 aguã rami,
 hembiapo re ju ha'e kuery oikuua pota aguã.
- ⁸ Vixo ikuai va'e voi oike 'rã onhemiaty py,
 ha'e vy okua py 'rã ikuai.
- ⁹ Vvytu jere oẽ 'rã ouvy opy ja'o oĩaty gui,
 ha'e 'rã vvytu ro'y ma kuaray yke katy gui 'rã
 oipeju.
- ¹⁰ Nhanderuete oipejua py rive ho'a 'rã yro'y,
 ha'e ramo yupi itui va'e hatãmba 'rã oupy.
- ¹¹ Arai ana overa va'e oua ma
 omonyẽ 'rã okyrã.
- ¹² Ha'e ramo arai ikuai va'e omondouka rã
 oaĩmba 'rã oje'oivy opa rupi,

- yvy jave áry rupi, ijayvuague ojapo aguã.
- 13 Ha'e nunga ha'e javi ombou 'rã yvy regua kuery
re oma'ë vy,
omo'arandu e'ÿ vy omboaxy aguã.
- 14 — Jó, ejapyxaka pota na pov'a'e re,
Nhanderuete rembiapo iporã va'e re reikuaa
pota aguã.
- 15 Ndee reikuaa teve marã rami pa Nhanderuete
ojapo
overa va'e arai gui ojekuaa aguã rami?
- 16 Omombe'ua teve ndevy arai ikuai va'e marã
rami pa yvate rupi ova-ova,
e'ÿ vy Oikuaapa va'e rembiapo porãgue ha'e
javi?
- 17 — Mava'e tu ojapo ndeo raku-a rendu aguã
rami
kuaray puku-a katy gui yvytu ou rã yvy jave
rupi okyririmbä rei oiny jave?
- 18 Hexeve voi teve ndee yva reipyo kuaa avi yvate
rupi,
jajexaa mba'emo ryku guigua rami overa rei
va'e?
- 19 Orembo'e ha'vy ore voi ixupe oreayvu kuaa avi
aguã.
Mba'eta ore ma pytû rupi orekuai va'e vy
mba'eve noromombe'u kuaai ixupe.
- 20 Amongue nda'u ixupe omombe'u 'rã
xeayvuague?
Ha'e rami avakue ikuai va'e onhemomba
ukaxe vy ma 'rã.
- 21 — Ma'ë, avakue ma yva re kuaray rexakãa re
noma'ë mbaraetei 'rã,
yvytu oipejua rupi yva oiky'a'opa ma jave.

²²Kuaray apu'a'ia katy gui hexakā 'rā ouvy iju va'e,
Nhanderuete yvýry rupi ojekuaa 'rā hexakāa
nhomondyipaarā.

²³Ipo'akapa va'e ma ndajaeko upityi 'rā.
Ha'e ma opo'akaa py yvate ete va'e,
ha'evea rami meme joguereko va'e guive, opa
mba'e py heko porā va'e vy.

²⁴Ha'e rami rā henonde avakue ojererokyje 'rā.
Ha'e ma onhemo'arandu rei va'e kuery re
noma'ēi 'rā — he'i.

38

Jó ndoikuuaii va'e re SENHOR oporanduague

¹ Ha'e va'e rire ma SENHOR peteĩ yvytu jere
mbyte gui ijayvu vy ombovai Jó. Ha'e vy aipoe'i:
²— Mava'e tu ndee mba'eve reikuua e'ŷ vy
xepy'aa ha'eve'ŷa rami remombe'u va'e?

³Eiko katu ha'vy ava rami,
mba'eta xee aporandu 'rā ndevy.
Ha'e rā ndee ma xembovai 'rā.

⁴— Mamo tu reĩ raka'e yvy ytarā anhono jave py?
Ndeayvu ke, anhetē ri ne'arandu va'e vy.

⁵Mava'e tu oa'ã raka'e yvy, xapy'a rei reikuuaa rā?
Mava'e tu ixā omoatā raka'e hi'áry rupi?

⁶Mba'e nunga áry tu ijyta oĩ?
Ha'e mava'e tu omoĩ raka'e ita jypy guarā?

⁷Ha'e va'e jave py ma jaxy-tata ko'ẽ rai'i javegua
ovy'a ete reve oporaei okuapy,
ha'e Nhanderuete ra'y kuery ikuai va'e
oguerovy'a okuapy.

⁸— Ha'e mava'e tu okẽ py rami ojoko raka'e ye'ẽ
iguy gui ovu ouvy jave?

⁹Mba'eta xee ae arai amoĩ ijaorā,

- ha'e pytū py anhovā ajukue py rami.
- ¹⁰ Xee ae amoī raka'e yy apyrā,
okē py rami ajoko vy.
- ¹¹ Ha'e vy aipoa'e: “Apy peve'i 'rā̄ reju, ndereax-
avei 'rā̄.
Apy ae 'rā̄ ndeguigua yai onhemboiyate reve
ojeapi vy oxopa”, ha'e va'ekue.
- ¹² — Ndee teve reikoa ára guive ndeayvu raka'e
ko'ē rai ouvya va'e pe,
ko'ē va'e pe reikuua uka vy hexakā aguā,
- ¹³ yvy apy re ovaē aguā,
heko vai va'e kuery omondyi heravy vy?
- ¹⁴ Yvy ojekuaa 'rā̄ yapo omou'ū mbyre
ha'e aq ixorīmba va'e rami.
- ¹⁵ Heko vai va'e kuery gui amokanhy 'rā̄ “Nhande-
vygua hexakā va'e” he'ia va'e,*
ha'e amopē 'rā̄ ijyva jojuka aguā oupi va'e.
- ¹⁶ — Ndee teve revaē ma ye'ē ryapy py,
e'ŷ vy reguata ma iguýry typyfea rupi?
- ¹⁷ Ndevy pe teve oexa ukaa omanogue ikuiaia
rokē?
Ndee rexma teve hokē pytū anaa py oī va'e?
- ¹⁸ Reikuua teve marā rami ete pa yvy ipya?
Ndeayvu ke, xapy'a rei reikuua ri vy.
- ¹⁹ — Mamo rupi tu oī tape hendy va'e ro katy oo
va'e?
Pytūa oīaty voi mamo tu oī?
- ²⁰ Erojevy ha'vy hekoa katy,
hoo via reikuua ri vy.
- ²¹ Ndee nhi'ā reikuua 'rā̄, ha'e va'e jave reiko ae ma
rire,

* **38:15** Heko vai va'e kuery pegua hendy va'e ma pytū ae, pytū
rupigua ae ikuai ramo (24.16-17).

- ha'e reikoa ára mbovy rei e'ŷ!
- 22 — Ndee teve revaẽ ma yro'y apĩ amoĩ porãaty py,
ha'e rexa teve amandau amoĩ porãaty?
- 23 Mba'eta ha'e va'e ma xee amboyrū imoiny an-
hombojexavai aguã,
joguero'a ha'e joe opu'ãa jave guarã.
- 24 — Mamo rupi tu oĩ tape hendy va'e oẽ ový aguã
katy,
ha'e yvytu kuaray oua katy gui yvy áry rupi
oipeju ouvya katy?
- 25 Mava'e tu oipe'a 'rã oky xapy'a-py'a ou aguã,
ha'e tape hyapu ha'e overa va'e ou aguã?
- 26 Mba'eta ambo'oky 'rã yvy áry
avave rei oĩ e'ŷa py, tekao e'ŷa rupi ae,
- 27 amoakŷ aguã yvy tekao e'ŷa ipirupa va'e,
ajapo aguã jai roky yvate ový aguã rami.
- 28 Oky nda'u tuu va'e oiko?
Mava'e tu ojapo 'rã yxapy otyky aguã rami?
- 29 Magui nda'u oiko yro'y hatã va'e?
Ha'e mava'e tu omoingo 'rã yro'y yva gui ho'a
va'e?
- 30 Mba'eta yy hatã 'rã ita rami,
yy typy rei teĩ hi'áry rupi ma hatãmba 'rã.
- 31 — Tyrã ndee teve rejokua kuaa Eixu jaxy-tata,
e'ŷ vy rejora kuaa Hendy guaxu va'e
ojokuaague?
- 32 Ndee teve reru kuaa 'rã jaxy-tata ijaty va'e,
e'ŷ vy reraa 'rã teve henoiny Ursu ta'y kuery
reve?
- 33 Reikuua teve yva re ikuai va'e rekorã oeja pyre?
Reikuua teve marã rami pa yvy re ha'e kuery
ipo'akaa?

- 34 — Tyrã ndee teve renhendu kuaa 'rã arai ikuiaia
peve,
oky vaipa aguã yy ndeao'i peve?
- 35 Tyrã overa va'e pe ndeayvu kuaa 'rã teve,
nembovai vy ha'e kuery "Apy ma roñ" he'i
okuapy aguã?
- 36 Mava'e tu omoñ 'arandu arai ikuai va'e áry?
Ha'e mava'e tu omo'arandu jaxy-tata ova aguã
re?
- 37 Mava'e nda'u o'arandu rupi oipapa kuaa 'rã arai
ikuai va'e?
Ha'e rami e'ÿ vy mava'e nda'u onhoë kuaa 'rã
yy yva re yryru ikuai va'e gui,
- 38 yvy ku'i oĩ va'e ojeapo aguã oja va'e,
ha'e yvy hakytã joe oje'apa aguã?
- 39 — Ndee teve rejuka 'rã guary kunha ho'u va'erã?
Ha'e guary ra'y kue'iry okaruxe rã remoevy-
atã kuaa 'rã teve
- 40 okua rupi ikuai javé,
e'ÿ vy onhemiaty gui oma'ẽ mbegue javé?
- 41 Mava'e tu uruvu kuery pe ojou uka 'rã ho'u
va'erã,
ta'y kue'iry Nguete pe ojapukai reve
ho'u va'erã rekaa rupi ikuai ramo?

39

- 1 — Ndee teve reikuaa kavara yvy'ãa rupigua ta'ya
ára?
Repena kuaa teve guaxu ta'y'i ta javé?
- 2 Reipapa kuaa teve mbovy jaxy peve pa ha'e
kuery ipuru'aa?
Reikuaa teve ha'e kuery ta'y'i aguã ára?
- 3 Ha'e kuery ma ta'y'i aguã ojero'a 'rã,
ha'e rami vy ojegui omoë 'rã haxy va'ekue.

- ⁴ Ta'y kuery ma imbaraetepa 'rã okuapy,
 nhuündy rupi ae 'rã tuvixapa.
 Oopa vy ndojevyvei 'rã oxy kuerya py.
- ⁵ — Mava'e tu opoi 'rã mburika'i ka'aguy regua?
 Ha'e mava'e tu ojora kuaa 'rã mburika onha
 ratã va'e?
- ⁶ Ha'e va'e rekoarã ma tekao e'ÿa ame'ë,
 yvy re'ëroa rive ame'ë ikuai aguã.
- ⁷ Ha'e kuery ojojai 'rã tetã revovo,
 noendui 'rã guive mymba reraa ojapuka-
 pukaia.
- ⁸ Yvy'ã ikuai va'e rupi ae okaruaty oĩ,
 mba'eta hogue pyau va'e rekao rupi ikuai.
- ⁹ — Toro ka'aguy rupigua teve ombo'eapoxe 'rã
 ndevy?
 Ha'e va'e teve pytû oaxa 'rã nerymba okaruaty
 py?
- ¹⁰ Remoxã kuaa 'rã teve yvy karaña re?
 Ha'e va'e nda'u nderakykue rupi oikaraï 'rã
 heravy yvy?
- ¹¹ Hexe teve ndee rejerovia 'rã imbaraete vaipa
 va'e ramo?
 Ixupe teve reja 'rã remba'eapoa rupi opena
 aguã?
- ¹² Hexe rejerovia teve renhotÿ va'ekue nderopy
 ogueru aguã,
 e'ÿ vy mba'emo remoa'yí aguã py?
- ¹³ — Guyra-nhandu ma opepo ombota-mbota 'rã
 ov'y'a reve.
 Ha'e rami teñ guague ha'e opepo nda'u joayvu
 aguã ri oguereko?
- ¹⁴ Any, ngupi'a oeja 'rã ov'y vy py,
 yvy ku'i py rive haku aguã py.

- 15 Mba'eta hexarai 'rã amongue opyrõ vy om-bovopa va'erãa gui,
vixo nhuñdy rupi ikuai va'e opyrõmba va'erãa
gui guive.
- 16 Nopena porãi 'rã gua'y kuery re, gua'y kuery e'ÿ
re rami.
Ndoikuaa potai 'rã gua'y'i okanhymba teĩ,
- 17 hi'arandurã Tuuete nome'ëi rire,
nome'ëi mba'emo re oikuuaa pota aguã.
- 18 Ha'e rami teĩ opo reve onha ov y aguã opu'ã ma
vy
ojojai 'rã heravy kavaju ha'e hi'árygua.
- 19 — Ha'e gui ndee teve kavaju pe reme'ë 'rã im-baraeerã,
e'ÿ vy ijaju'y áry rupi remoï 'rã haguerã?
- 20 Rejapo kuua teve tuku rami opo ov y aguã rami?
Nhomondyi 'rã oapyïgua gui ipytue raku rei
reve onhendu vy.
- 21 Ojo'o 'rã heravy yvyugua ombaraetea ae
oguerovy'aa rupi.
Ha'e vy ojepe'a 'rã ov y tembiporu revegua
kuery reve joguero'a aguã.
- 22 Ojojai 'rã nhomongyjea kuery onhemondyi e'ÿ
re.
Ha'e rami vy guakykue katy ndojevyi 'rã kyxé
revegua gui voi.
- 23 O'áry hu'y ryru ogueraa va'e omoparã 'rã her-
avy,
hu'y guaxu ha'e hu'y'i hexakã va'e reve.
- 24 Ipoxy ha'e ivai reve omou'ñmba 'rã heravy tape,
mimby guaxu nhe'ë oendu ma vy ndojejokoi
'rã.
- 25 Mimby guaxu omonhe'ëa ramo “Tenonde katy!”
he'i 'rã.

Joe opu'ãa gui mombyry teri oo reve oetũ 'rã,
oendu 'rã huvixa kuery ojapukai atãa ha'e
tembiporu revovo.

- 26 — Ndee ne'arandua rupi teve taguato oveve,
kuaray apu'a'ia katy opepo oipyo reve?
- 27 Ndeayvua rupi teve taguato guaxu oo 'rã yvate,
ha'e yvatea py guaityrã ojapo?
- 28 Ha'e va'e ma itaova yvate va'e re oĩ 'rã guaityrã
ojapo aguã py,
itaova yvate va'e apyte áry, mba'eve rei
nomoangekoia py.
- 29 Ha'e py oĩa gui oexa pota 'rã guembiarã.
Mombry guive 'rã oexa.
- 30 Ha'e va'e rire ta'y kuery oipyte 'rã tuguy.
Mamo rã rei te'õgue ituia py ha'e voi ovaẽ 'rã
— he'i.

40

- ¹ Jó pe SENHOR aipoe'ive tema:
- ² — Ha'e gui ijayvu poyi va'e nda'u nhombovake ta
Ipo'akapa va'e reve?
Nguuete rovai ijayvu va'ekue tombovai aÿ —
he'i.

Jó onhemo'yvyi'ia rupi ombovaiague

- ³ Ha'e ramo Jó ombovai SENHOR. Ha'e vy aipoe'i:
- ⁴ — Xevy pe ma nda'evei. Mba'exa tu rombovai ta?
Ajoko 'rã xejuru xepo py.
- ⁵ Peteïgue xeayvu rire teñ nambovai kuaavei ma.
Mokoïgue katu va'eri ndaxeayvu reguavei ma
— he'i.

*Nhanderuete po'akaa hembiapo oexa uka va'e
re ijayvuague*

6 Ha'e ramo yvytu jere mbyte gui SENHOR ombo-vai ju. Ha'e vy aipoe'ive Jó pe:

7 — Eiko katu ha'vy ava rami.

Xee aporandu 'rã ndevy, ha'e rã ndee xembo-vai 'rã.

8 Ndee ta'vy remboyke rive 'rã xerekó porãa?

Xemboeko vai 'rã teve renhemboeko porãvexe vy?

9 Tyrã ndee teve Nderuete rami ndejyva mbaraete va'e?

Ndee voi ndeayvu ryapu rei 'rã teve xee xeayvua rami?

10 — Ndejee emoĩ ha'vy ndeyvatea ha'e ndetu-vixaa.

Enhemonde ndepo'akaa ha'e nerexakãa py.

11 Xevy pe exa uka ndepoxya.

Exa pota onhemboyvate rei va'e kuery re, ha'e eitypa.

12 Exa pota onhemboyvate rei va'e ha'e javi re, ha'e emo'yvyimba.

Epyrõmba vyvoi heko vai va'e kuery ikuiaia re.

13 Ejatypa imbokuapy yvy ku'i py.

Ejao'ipa hova ituia py.

14 Ha'e rami rã mae 'rã xeayvu

reiporu kuaa regua py ae ndepo'akaa rami.

15 — Eikuua pota aÿ hipopótamo ndereve amoingo avi va'ekue re.

Ha'e va'e ma vaka rami nhuũ ho'u oikovy va'e.

16 Imbaraetea ma hye re oĩ,

ipo'akaa ma hyepy ro'o re ae.

17 Huguai ma yary rakã rami hatã va'e.

Hi'u rajy ma oipopẽ mbyre rami oĩ.

18 Ikãgue ma overa va'e aygue rami imbaraete va'e.

Hetyma ma ferro aygue ramigua.

¹⁹ Ha'e va'e ma Nhanderuete remimoingo regua
omboetevevpy.

Imoingoare ae ome'ẽ kyxē hembiporurã.

²⁰ Anhetẽ, yvy'ã ikuai va'e áry rupi oĩ nhuũ ho'u
va'erã,

vixo nhuñdy regua ikuaiaty rupi.

²¹ Onheno 'rã yvoty ikuai va'e guy rupi,
takua'i ha'e yapo oĩ va'e rupi.

²² Ha'e ramo yvoty ae omo'ã 'rã inony.

Yy rembe rupi yvyra ikuai va'e mbyte py itui.

²³ Yakã tyguaxu teĩ ndojapurai 'rã.

Ijuru peve ete Jordão yakã typy teĩ oiko porã
rei 'rã.

²⁴ Ha'e rã oma'ẽ ho'amy ramo amongue nda'u
ojopy kuaa 'rã?

Ha'eve 'rã nda'u ixã rupi omoxã aguã?

41

¹ — Ndee renoẽ 'rã teve jakare pytã pinda py rive,
ha'e'ỹ vy inhapekũ rejokua 'rã ixã py?

² Jai 'ygue remboaxa 'rã teve inhapýigua rupi?

Ha'e rami e'ỹ vy remombu 'rã teve hañhykã
jepo'ioia py?

³ Ndevy pe ha'e ojerure 'rã teve mba'emo re?
Ijayvu porã'i 'rã teve ndereve?

⁴ Ndereve ojapo 'rã teve peteĩ rami pendekuai
aguã?

Ha'eve 'rã teve reraa aguã nerembiguai raka'e
rã peve guarã?

⁵ Rembojaru 'rã teve guyra'i rami?

Ha'e rami e'ỹ vy remoxã 'rã teve heruvy nder-
ajy kuery rymbarã?

- 6** Neirū kuery teve jogueroayvu 'rā hepyrā oikuaa
aguā?
Ha'e rami e'ŷ vy mba'emo vendea kuery teve
omboja'o 'rā ho'okue?
- 7** Pira kutua py teve reikutupa 'rā ipire,
e'ŷ vy inhakā rupi renhyvō 'rā pira nhylvōa py?
- 8** Hexe repoko ri vy nema'endu'a riae 'rā
nderero'aague re,
ha'e rami vy neremoangekovei ma 'rā.
- 9** Ma'ẽ, pembo'a aguā pearō ri vy pejekore 'rā.
Hexe avakue oma'ẽ vy rive 'rā ojeity uka.
- 10** Avakue ipy'a guaxukueve teĩ ndoikoi omȳ
va'erā.
Ha'e rami rā xerenonde katuve ma mavā'e tu
ha'vy onhemboyvate aguā ha'eve va'e?
- 11** Mava'e tu ha'e ranhe xevy ome'ẽ mba'emo, xee
ju amboekovia aguā?
Mba'eta yva guy re ikuai va'e ma xemba'e
meme.*
- 12**— Xeayyuve ta jakare reko re,
imbaraete etea ha'e iporāa re.
- 13** Mava'e tu oipiro 'rā ikupe rupi,
e'ŷ vy oikutu 'rā ipekue jo'a va'e pa'ū rupi?
- 14** Mava'e tu oipe'a 'rā ijuru?
Mba'eta haĩ re onhemboja va'e oendu 'rā
ngyje.
- 15** Ipekue hyxy ovya re ma ojejou porā,
peteĩ-teĩ joe oja 'rā omboja pyre rami.
- 16** Peteĩ-teĩ joe ovaẽ oiny
ipa'ū rupi neĩ yvytu oike aguā rami e'ŷ.
- 17** Peteĩ-teĩ joe ovvy
oja ratā oiny oja'o aguā rami e'ŷ.

* **41:11** Romanos 11.35

- 18 Ipytuē nhavō ojekuaa 'rā hendy va'e,
ha'e rā hexa ma ko'ēa rami hexakā va'e.
- 19 Ijuru gui ma oẽ 'rā hendy va'e,
ixugui tata raviju opo 'rā.
- 20 Inhapyīguā gui ma oẽ 'rā hataxī,
oja opupu va'e gui, e'ŷ vy jai rogue okai va'e
gui rami.
- 21 Ipytuēa ma omoendy 'rā tapyīū.
Ijuru gui ma oẽ 'rā tataendy vuku.
- 22 Ijaju'y re ma imbaraetea oĩ.
Ha'e henonde gui opoa 'rā ovv onhemondyipa
reia rupi.
- 23 Ho'o regua ma oje'a ratā 'rā.
Hexe oĩ atā 'rā, oi rive aguā rami e'ŷ.
- 24 Ipy'a ma ita rami hatā,
ita mba'emo mongu'ia regua rami.
- 25 Ha'e opu'ā ramo ipy'a guaxukueve voi on-
hemondyi 'rā okuapy.
Ha'e ou xapy'a ramo ndaekorāvei va'e rami
ikuai.
- 26 Xapy'a rei kyxe py omboguaia teĩ mba'eve ndo-
japoi 'rā,
neĩ hu'y guaxu py, hu'y'i e'ŷ vy hu'y ete py teĩ.
- 27 Ferro guigua ha'e oikuaa rā jai rogue pirukue
rami rive,
ha'e overa va'e guigua ma yvyra ru'ūgue rami
oikuaa.
- 28 Hu'y gui ma ha'e nonhai 'rā.
Ita momboa py omomboa rā ha'e oikuaa
kapi'i rami rive.
- 29 Yvyra aygue py ojapia rā jai 'ygue rami rive 'rā
oendu,
ojojai 'rā hu'y guaxu revegua.

- ³⁰ Hye guy rupi oĩ ipekue hakua va'e.
 Yapo áry rupi otyryryague ma mba'emo ra'yĩ
 ykya rami ipore.
- ³¹ Yy guy katy oike vy ojapo 'rã oja opupu va'e
 yjuipaa rami,
 ye'ẽ eteve voi mba'emo rykue ombojyat� rami
 ombokururu 'rã.
- ³² Guakykue oeja 'rã hape ovv va'e overa aguã
 rami.
 Yy ha'e oĩa ma hi'a xiimba va'e rami yjuipa 'rã.
- ³³ Yvy re jipoi 'rã ha'e ramigua,
 mba'eta okyjea oendu va'erã e'ŷ amoingo.
- ³⁴ Yvatekueve ha'e javi re oma'ẽ vy nombovarei
 'rã,
 vixo yvatekueve ikuai va'e ruvixave oiko vy
 — he'i.

42

Jó onhemombe'uague

- ¹ Ha'e ramo Jó ombovai vy aipoe'i SENHOR pe:
- ² — Aŷ aikuaa porã ma opa mba'e rejapo kuaa
 va'ea,
 ha'e renhembopy'aague peteїve ndoiko e'ŷi
 'rãa.
- ³ Ange xevy reporandu vy “Mava'e tu ndee
 mba'eve reikuua e'ŷ vy
 xepy'aa ha'eve'ŷa rami remombe'u va'e?” 're
 va'ekue.
 Anhetẽ ri aikuaa vy e'ŷ xeayvu va'ekue,
 mba'emo xevy pe iporã vaipa ha'e aikuaa
 va'erã e'ŷ re anho.
- ⁴ Aipo're avi: “Ejapyxaka ke xeayvu re, ha'e rã xee
 xeayvu 'rã.

Xee aporandu 'rã ndevy, ha'e rã ndee xembo-vai 'rã", 're va'ekue.

⁵ Ha'e rami avi xee roikuua va'ekue omombe'ua rã aendu vy rive,

ha'e rã aÿ ma xerexa py ae roexa ma.

⁶ Ha'e rami vy aÿ anhereroangeko vy anhem-boaxy,

yvy ku'i ha'e tanhimbu áry aguapy ainy reve — he'i.

Jó irũ kuery mboapyve pe Nhanderuete ijayvu eteague

⁷ Ha'e rami Jó pe SENHOR ijayvupa ma rire aipoe'i avi Temã pygua Elifaz pe:

— Xepoxya hendy ma nderovai, neirũ kuery mokoïve rovai guive. Mba'eta anhetẽ rupi e'ŷ peẽ kuery xemombe'u, xerembiguai Jó rami e'ŷ.

⁸ Ha'e nunga rupi peraa sete vaka ra'y ha'e sete vexa'i ava, ha'e tapeo xerembiguai Jó-a py. Ha'e vy peapy reve peme'ë 'rã pejejavyague re. Ha'e gui xerembiguai Jó ojerure 'rã pendere, mba'eta ha'e ojerurea ma aendu 'rã, pene'arandua rupi e'ŷ peikoague re rombopaga e'ŷ aguã. Mba'eta anhetẽ rupi e'ŷ peẽ kuery xemombe'u, xerembiguai Jó rami e'ŷ — he'i.

⁹ Ha'e ramo Temã pygua Elifaz, Sua pygua Bil-dade ha'e Naamá pygua Zofar oje'oi vy ojapo okuapy SENHOR ijayvuague. Ha'e ramo SENHOR oendu Jó ojerurea.

Nhanderuete Jó omoingo porã jevyague

¹⁰ Ha'e gui Jó oirũ kuery re ojerure ma rire SENHOR omoingo porã ju. Ha'e vy mba'emo oguerekova'ekue gui mokoïguea ju ome'ë retave ixupe.

11 Ha'e ramo ha'e oĩa py ou tyvy ha'e heindy kuery, ymave rupi oexa va'ety ha'e javi reve. Hexeve okaru okuapy hoo py. Omboaxy vy om-bopy'a porã okuapy hexe SENHOR mba'emo vai ombouague ha'e javi gui. Ixupe peteĩ-teĩ ome'ẽ peráta ha'e kuã regua ouro guigua.

12 Ha'e rami py SENHOR omoingo porãve Jó jypy guare gui. Ha'e ramo vexa'i kuery oguerekove ju catorze mil, seis mil camelo, mil toro meme ha'e mil mburika.

13 Ta'y jevy avi sete ta'y ha'e mboapy tajy kuery re.

14 Jypygua guajy omboery Jemima, amboae ma Quezia, ha'e rã mboapya ma Quéren-Hapuque.

15 Ijyvy ha'e javi rupi kunhague ndoikoi Jó rajy kuery rami iporã va'e. Ha'e ramo ha'e kuery pe tuu ome'ẽ mba'emo ikyvy kuery pe ome'ẽa ramigua ae.

16 Ha'e va'e rire ma cento e quarenta ma'etõ re ju Jó oiko. Ha'e rami vy oexa gua'y kuery, gua'y ra'y ha'e guajy memby kuery guive, irundykue ikuaiia peve.

17 Ha'e rire Jó omano, tuja'i ha'e hi'ára mbovy rei e'ŷ ma vy.

Nhanderuete ayvu iky'a e'ŷ va'e New Testament in Guarani, Mbyá

copyright © 2004 Wycliffe Bible Translators, Inc.

Language: Mbyá Guarani (Guaraní, Mbyá)

Translation by: Wycliffe Bible Translators, Inc.

Copyright Information

© 2004, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 853110565X

The New Testament

in Guarani, Mbyá

© 2004, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-08-06

PDF generated using Haiola and XeLaTeX on 11 Nov 2022 from source files
dated 29 Jan 2022

3309fa3b-7590-5ae9-b829-5df4ddfbf957